

CHINESE - JAPANESE LIBRARY
HARVARD - YENCHING INSTITUTE
AT HARVARD UNIVERSITY

04


OCT 1951

T.5460/1244.3

翁山詩外

共十二本

四



翁山詩外

卷之七

番禺 屈大均

撰

五言律 三

荅張君篆

哈神齋
書館印

書

張子知名久南康舊法曹
佳廬憶蒼翠彭蠡夢波濤
白鶴歸何早芝華采未勞
劍光如彩玉相贈及秋高

自古楚歌好滄浪與鳳兮
今君擬騷些春艸賦萋萋
獨往惟漁父相逢此碧谿
羅浮日未出與子待天鷄

有女分銀管隨君出畫堂
左思憐織素太白愛平

陽小鳳桐花煖新蟬柳葉涼近聞能咏雪兼寫十
三行

相憐茲白髮逼迫有秋霜鏡已沉鸞鳥裘空與鷓
鴒楚辭多越禮秦女久無香君有忘憂艸春來好
寄將

贈何給諫

老矣黃門客軍中昔苦辛江山無半壁市井有孤
臣海日生紅樹天風起白蘋相公家學在詞賦亦
經綸

題尹銓部蘭陔別業

欲共山公醉移居傍習池紅顏花底駐綠髓酒中

滋聲色何妨道清狂是此時向來觀物化蝴蝶亦
吾師

夜半羅浮日高高上沈寥光含滄海氣聲振大江
潮簾捲諸峰入樓開百合朝虎門看咫尺帆影滿
青霄

水長頻無路林深似有山蟬聲隨雨去荷氣逐風
還柳外龍媒蹠花中雉子斑謝公正休沐日夕道
心閒

春懷

泉下多吾友兼之窈窕姿鏡臺餘落粉花徑失香
綦燕子皆雙宿櫻桃不獨枝相思無日夜不覺鬢

成絲

荅凌天杓

昔作探丸客今為鼓柁人全家向南海匹馬別西秦日出天鷄曉冰開塞艸春承君問遊俠一劍正逡巡

君產秦淮曲才華掩六朝拂衣去宮闕長嘯上金焦地入盧龍冷天生塞馬驕丹青知絕詣憑爾畫

嫖姚

凌善畫在查將軍幕

南武山川險君來百戰餘文章驚幕府談笑上戎車才子偏能射將軍亦著書樓船清暇日觀海出扶胥

送人還嘉禾

梅關向梅里懷土意淒其越鳥多南客孔雀日蠻南客花少北枝無媒惟橘柚有子盡相思慷慨難為別追尋未可期

送沈文學之韶州

三十六韶石芙蓉翠可憐重華曾奏樂遺響在林泉龍馭留荒服珠丘隔暮天憑君陳桂酒去洒九疑煙

桂水三瀧口衡陽五嶺門秦關惟此險朔馬至今屯莫道炎天小應知赤帝尊君看形勢好彩筆定飛騫

雕胡分雁膳臨水勸加餐一路篙舟去愁君日上
灘肉芝含雪長花瘴入秋殘處處仙靈窟長謠拂
羽翰

送鮑子韶還贛州

嶺南秋氣早八月已寒衣處處邊笳咽年年塞馬
肥空增滄海戍不慮白登圍漢使君能任重來事
未非

朝臺黃氣在偏霸意如何鴻雁秋還少牛羊日已
多大才先艸檄餘力在橫戈遲爾梅關上圖書載
橐駝

如何炎徼外乃有二貪泉香尉繇來衆金裝亦未

賢君知貧賤好祇載素馨鮮歸種章江曲長吟對
紫煙

贈張總戎

將軍自行酒醉我越臺東往日青蓮客能成大將
功鞫鷹方側日櫪馬不嘶風一片深沉氣屠沽事
未終

望海

海氣夜成潮潮鷄唱沈寥流隨明月滿聲入大江
消大小趨雙汎東西蕩一樵秋來多水宿乘漲命
蘭橈

別稚女

稚女難爲別臨行淚欲揮可憐初絕乳未解一牽
衣念爾在襁褓同予餐蕨薇晨昏娛祖母莫使笑
聲希

端州道中

嬌鳥一山響秋來多曉晴月含清露濕花出白雲
明行役書難著棲遲道易成僕夫工早起催上手
車輕

雙槳搖魂夢江干欲曙天鷄鳴催落月人語亂寒
煙作客憑詞賦歸畊少薄田潘郎多內顧咫尺已
情牽

峽口苦風浪維舟日未曛采聲浮古寺石氣結寒
雲山東三江小沙迴一水分思家愁不寐竟夕戍
歌聞

河頭舟中

一夜寒山雨泉聲處處飛牽舟上霞壁買酒驚采
屏石亂灘無路苔多地有衣殷勤林上鳥喚客不
如歸

宿那烏塘田家

數峯如古木上下繞藤蘿拔地雲根亂參天石筍
多人煙迷洞口雨色暗寒河暮向田家宿情如雞
黍何

自五藍經熱水山八十里至大牙宿

日暮未遑宿我勞將奈何
野花含笑滿山鳥畫眉
多古木蒙蒼蘚溫泉出
綠莎林深屢迷路衝虎
一人過

題電白熱水山

我向擎雷去頻經熱水來
峰峰蘿薜滿面面瀑泉
開花裏多猿飲林間有
雉媒斜陽在西崦繫馬
尚遲迴

珠湧寒泉裏潺湲觸石分
寒融千嶂雪暖結一溪
雲十里丹砂氣三時沉
水薰寅午酉三時尤熱神靈嗟此
水世上少人聞

四出青峰下褰裳未敢前
純陽成玉液真火在寒

泉不斷炎霞鬱時流落蕊
鮮晚風吹不冷堪拂石
牀眠

南國多炎德吾生服餌高
荔支皆火實湯液卽金
膏自此蠲憂疾兼之長
羽毛太陽流烈氣噓吸
未爲勞

經陽江電白邊界感賦

南極成沙塞長城界海雲
濤聲天外落雨氣日中
分不見戈船影徒勞甲馬
羣紅巨有孤島辛苦漢
將軍

城從虎門起千里跨空冥
多壘虛防海非邊亦築
亭中華餘一島正朔在重
溟望斷黃龍艦風帆似

水萍

次魚洞

豺虎應相識年年此路行猶生慈母望不歿故人
驚水漲春多毒林深晝一晴雨中白雲起隱隱數
峯明

高涼遇歐陽先輩賦贈

寂寞高涼郡相逢白髮人軍中三祭酒漢末一孤
臣榴蕊頻燒日鶯聲尚弄春滇南多變事為我話
酸辛

石船仙處士錦繖女將軍往迹披蒼蘚微誠托紫
芬英雄羞粉黛變化望風雲且作山中逸翩翩鸞

鶴羣

贈吳使君

嗟子橫江客

使君和州人

東西別二梁風沙才朔漠瘴

癘又南荒四十猶州郡平生只老莊無人論將相

闕下望馮唐

博望通筇竹相如起錦城二京推雅頌萬里建功
名好色離騷似求仙大藥成奇懷真曠世誰可話
生平

復治高涼郡朱幡照上遊一身兼四岳千里帥諸

侯鑑水煙波曉雲爐名山紫翠秋晨昏事尊老春艸

色油油

賈父來何晚仁聲滿海康所餐惟薏苡勿翦是桃
榔白鹿行春色青鶯返夜光愧非徐孺子下榻在
君旁

千載無詞賦吾師一阮公今君詠懷作亦與寓言
同一代推名飲諸賢挹素風以予狂簡者邀入竹
林中

行行射麋鹿處處市珍禽愛此白鷗好鳴聲如玉
琴持歸媚小婦兼以荅知音文采感相惜巢君珠
樹林

贈張十二

君家賢從子南嘗誦四愁篇豈意隨仙吏相逢在

海天風騷今幾變金石爾相宣樂府聲多楚惟應
知者傳

往口稱詞伯長洲一迪功徐楨今君起吳下亦可

傲空同家在闔廬苑客遊扶木東三閭乃騷聖與
子溯流風

麗玉筌篔引中郎黃絹辭勞君抽象管爲我弔蛾
眉花好難成子桐孤未有枝胡香求四兩將以慰
相思君有詩悼
子舉姜

朝露託桐葉人生能幾何須君東海月長照北山
蘿二十已高尚平生惟嘯歌相期作嵇阮飲酒養
天和

化州道中寄時子

林深多直木水漲失清溪野艸白成路山花紅作泥
臥驚采子落行畏夕陽西跋涉因何事圖君玉
手攜

途中遇雨作

行子冒風雨連朝饑且寒一身徒自苦十口不曾
安路斷愁多水林香喜有蘭野花休見笑吾道本
艱難

化州道中

百里盡珍禽林中交好音落花封虎跡流水澹人
心誤踏峰峰葉貪眠處處陰僕夫憂日暮驅馬去
駸駸

送客上英州

水從三峽落峰向二禺迴雲噴潮難上雷轟石不
開鳥憐南翥好花恨北枝催碧落仙人洞藏書待
爾來

遂溪道中

車輾空林響深愁虎豹聞路從山鬼問身與僕夫
分日氣含殘雨天葩散白雲聲聲行不得負爾鷓
鴒羣

次沙澹

四野無蠻落荒雞何處聲風驚雙鶻出月照一人

行點鬢愁霜早沾衣喜露輕丈夫矜七尺饑渴見
生平

次閘口

忽自投豺虎生還亦偶然路迷千里瘴行盡九真
天夢裏知親病貧中賴婦賢那能如孔雀身上有
金錢

廉州雜詩

象郡元秦塞龍門是漢關天開珠母海地接桂林
山交趾兵頻入戈船使未還何時銅柱折吾見滅

南蠻

粵謠云銅柱折交趾滅

海上餘珠市城中盡竹房居臨鮫室近望入象林

長野曠秋無色江清水有霜炎州惟此地風景最

荒涼

城西江水貫婦女賣魚橋珠母生明月鮫人出紫

綃海光千里接霞氣五黃山標何處大廉洞人傳

藥草饒

六池光瀲灩寒動郡城樓分野非東粵炎荒亦早
秋伏波瞻漢廟棄地恨交州一夕廉山宿淒涼欲

白頭

玳瑁乘生水蚺蛇吐毒雲花從江口合茅向嶺頭
分銅鼓交蠻器金標漢將勳青牛城上望懷古思
氤氳

珠隨明月滿半作淚光流獨立當蟾兔相思若女
牛投荒頰自苦入海欲誰求忍使閨中子離顏一
片秋

下馬還珠驛山光見百良

山名狎狂賢太守零落古

封疆碑沒莓苔字堂虛俎豆香漢家今已矣憑弔

淚沾裳

太守謂孟嘗

豈意珠官郡珠娘豔色多褰裙臨水汲跣足踏花

過錢辯開元字

廉州純用唐開元錢

箏調合浦歌酒漿頻獻

客甘有蔗霜和

漢代經營地今餘蔓艸長軍無新息將女作麤冷

王煙重鳶頻墮霜高桂自芳越州城下水流盡淚

湯湯

白龍池最大

珠池以白龍池爲大

百里盡珠胎赤子兵頻弄

紅夷舶恐來邊牆殊未築海界已先開此地成雲

朔勞君鼓角哀

甘蔗新調粉班枝未脫綿捉人餐玉鱸留客取金

鞭鸚鵡雖多慧桃花已悟禪爲卿書諷賦不惜練

巾妍

殷勤求孔雀迢遞自防城五歲金花滿三年小尾

成文章聊自喜飲啄不須驚莫使珠毛損樊籠足

寄情

去苦炎天遠歸愁白髮多珠光秋吐納銅表日摩

婆披髮憐交吐揚威憶伏波陸沉殊未已何處有
關河

百里無煙火林峰氣鬱蒼月中穿虎口花裏轉羊
腸命有三人託身餘一劍防閒關差不負詩句卽
金裝

高廉雷三郡旅中寄懷道香樓內子

美人居莞水遊子在崧臺一片閨中月清光夜夜
來淚痕知滿鏡行處定生苔白露秋方冷芙蓉勉
自開

月井蜘蛛度花軒翡翠過風長憐柳弱水綠恨萍
多瘦出飛龍骨涼添孔雀羅裁書頻見寄細膩寫

曹娥

知爾繡鞋香別來雙帶長三秋多怨曲七夕定新

粧珠掠

東莞女子以珠

盤明月花梳

以彩絲貫素

日花梳

問海棠針樓如有夢西去卽高梁

碁局閒楸玉熏爐冷鬱金半年爲伉儷三度作商

參菡萏新含的芭蕉好展心學詩諸弟子劉碧最

知音

肝臟莖多汁檳榔子滿房道中雖解渴閨裏更生
香馬上苔痕滑車盤石磴長飛飛合浦葉何日始
還鄉

日日廉陽道愁攀碧柳枝可憐千萬縷總是一相

思海女開珠肉蠻童鬪畫眉夜光應購得歸作耳
璫垂

此日稱閨秀三娘復令嫺內子亦貧愁書卷少病

惜筆牀閒組繡憑雙膝釵鈿買一山心光憐水月

禪坐碧池間

遂我幽棲志平生得孟光况兼鸞鳳彩益助薜蘿

香月夕聯珠句花晨對羽觴不須懷媚蝶歡愛在

文章

赤蟹秋來美蠻娘素手分心憎巾影拂夢恨鬢花

薰椰子含甘液伽南吐紫氛幽閨人正苦不忍戀

徐聞

課妾香奩體娛姑綠綺聲煥寒勤診問甘毳苦經

營廡下書能著牆東隱已成因人又于役貧使別

離輕

馳驅嗟命苦四十好端居深井寧無里中田尚有

廬堂前呼犬子膝下玩蠶書莫問霸王事吾才日

以疎

夫人張繡幃刺史奮羅裙犀杖先朝淚鸞旗女子

軍英雄歸粉黛事業比桓文肅肅瞻遺像題詩一

報君夫人洗

白髮孀姑在鷄鳴汝問安長先諸妾起不顧一身

寒抹麗裝花引沉香製筆盤新詩多麗則娣奴定

傳看

路暗隨螢火行行陷澤中陰森山鬼影凜冽野鷹
風汗洒炎雲濕愁將碧水空幽閨知己在未擬哭
途窮

樹樹山鵲喚村村笏竹圍炎雲秋更起清露午方
晞高士難求食佳人易樂饑歸與浮嶠曲與子共
芝薇

未夕

未夕見新月微微如白雲牛羊數峰落煙火一林
曛樵女歌聲合漁人艇影分不知花近遠溪口卽
香聞

欽州

野外稀禾黍城中但橐駝愁聞新戰鬥忍見舊山
河荒服餘交趾將軍憶伏波南征遺玉笛猶奏武
陵歌

汪學博攜飲羅湖

湖在雷州城西

亦有羅湖好芙蓉散旅愁花花棲海燕葉葉下江
鷗往日多遷客茲焉弄碧流我來訪遺迹先上二
蘇樓

隨君尊酒去一一上湖橋童子木蘭柁將軍青玉

簫是日史守戎在坐暮風生鐵颶春水上鹹潮竝馬嚴城

入月明還見招

中原從此盡回首奈愁何地控三洋海人祠二伏
波涼應天北少風是日南多况有澄湖水亭高出
芰荷

雷陽作

鷓鴣啼不已春艸更萋萋地向擎雷盡天連漲海
低中華勞夢寐白首苦東西杯酒沉寔好歸與有
釀溪

雷女

雷女工締綌家家買葛絲贈夫多越布用徐淑事生子
是珠兒玳瑁裝眉掠檳榔代口脂蠻中妖豔質半
在海洋湄

陽江道上逢盧子歸自瓊州賦贈

嗟君南渡海波浪白吞空三日迷瓊島中流遇颶
風生還自魚腹險絕有神功詎料乘槎客依然道
未窮

大風吹海嘯舟似轉蓬飛競與波濤鬪私將涕淚

揮旌旗過水怪燈火降天妃欲作玄虛賦心魂今

尚微天妃海神吾粵事之甚謹盧子足日舟幾覆

數匝兼花香酷烈舟遂定得濟

波中湧山岳知是海鯨迴勢欲吞舟去光先噴火

來不須頻拔劍自可靜揮杯忠信豚魚格多君學

易才海鯨身長百里口中噴火能吞巨艦遠望若丘山也

黑風寒挾雨城沒大洋邊魚驚人誰免波濤爾獨
懸行穿龍洞穴戰退鬼樓船莫向高堂道平生險
自憐七月海嘯水沒城溺人甚衆

高帝稱奇甸南溟豈大荒諸華同禮讓一賦重文

莊我高皇帝嘗稱瓊州爲奇甸丘文莊因作奇甸賦爾去觀風土身先入

衆香遍書珍異物詞藻照蠻方

天晴空翠滿五指名山拂雲來樹樹奇南結家家末

而開野人朝獵去黎女暮歌迴調酒黃麀血君曾

盡幾杯

首夏過瓊甸檳榔得食花螺杯川上拾拾酒洞邊

賒逸興凌山月新詩奪海霞買愁村若到定愛髻

鬢斜

檳榔花絕甘美開以四月
鷓螺諸殼大者可爲酒杯

海上多香螺鷓
拾酒倒拾子所

釀之酒也

人人攜釀具處處熟離支一夕香成酒三危露滿

卮和風嘗衣袷暑氣不侵肌花是檳門好清芬百

里吹土人多就樹釀荔支酒

方物生黎獻黃麀黑狗熊大旗書向化小隊拜當

中憲府宣威德炎洲息戰攻丹青憑爾筆繪出島

夷風盧子親見生黎人入獻方物於瓊州副使旗書黎人向化四字

鸚鵡嬌能語獼猴小似拳攜歸橫秀閣君讀書處得自

會同川子女分葵笠君王望玉鞭公車應早上莫

卽戀林泉

贈黃勉思

廬墓今何去西樵瀑水西故人思寄子居士已無
妻未敢忘溝壑何當罷鼓鼙離亭相送後風雨各
淒淒

東安

雨餘蒼翠滴山影滿城中谷小人煙合林疎瘴氣
通峰峰多石笋處處有花宮向夕星巖上搖天一
片鐘

匡廬九疊屏分得一峰青地削芙蓉瓣天懸瀑布
甕千山連彩翠半壁障空冥一片城西影風吹落
縣庭

題張氏石鱗山房

在東安城東

瀧東好巖壑片石亦嵯峨樹樹穿雲竇峰峰拂水
波落花閒處滿啼鳥靜中多君有茆茨在棲閒奈
樂何

四壁蒼苔滿晴餘瀑布痕玲瓏多洞穴繚繞盡林
園谷口雲霞塞人家彩翠屯九星巖咫尺城外有
啼猿

壁峻全如削峰斜半欲飛雲根爭絡石玉乳亂沾
衣處處梅花覆村村古木圍鹿門妻子在來此借
漁磯

壽蕭山周斗垣丈

五律三

高隱湘湖曲年過九十秋天遺一老在人以八朝
留白髮中華物黃雲故國愁仙成將令子註籍向
羅浮

蟬

日夕高槐上爲君吟不飛那驚秋氣早所恐露華
晞多患因孤潔無聲亦翠微流泉將落葉知此不
妨希

沙亭作

讀書慈母側千卷繞庭幃山淺難逃世林幽且掩
扉燕銜花藥重蟬飲露華微蕭散長無事天留此
布衣

六月收粳稻人喧隴畝間日光穿白雨雲氣漲青
山薄酒嫌無力餘花恨少顏亂離如未已皓首此
柴關

復作蓬蒿客蕭然學坐忘白花堆酒美青果點茶
香故國頻興廢新書漫短長弓刀從散失無意向
沙塲

豈意才難用英雄作蠹魚一家憎寶劍十口食仙
書亂後知交盡愁中嘯詠疎故人方轉戰消息阻
扶胥

幸不膏原野歸來一杖輕著書宜晚力爲道及餘
生土布蕉絲滑村醪荔液清嘯歌應自足莫負紫

芝榮

初正沙亭作

雨霰微微落農夫喜濕年

諺曰乾冬濕年禾黍滿田

寒生除夕

後暖在大冬前避世猶無策書王亦有權蒸湘方

接戰天肯任投鞭

白首為農事黃冠是野夫祈年隨父老在世作仙

儒花插高堂喜鶯歌稚子娛但令憂患少閉戶即

黃虞

天寒長雨汁歲日尚陰陰朔吹猶依樹春聲已弄

禽家貧難賣力世變易驚心霸府開何處徒勞望

氣深

天哀遺種客又度一年華點鬢從青女持身且白

華雨侵朝火濕風壓夕堂斜酒好頻霑醉高堂樂

未涯

魚鰈浮妻子歸來鬱水濱一家存漢臘十口託秦

人老鶴丹生頂雞采白有鱗流光催半百誰愛歲

華新

人日酒

年年人日酒只是為黃泉

亡室率姜人日生

淚向采楸滴

愁同枕簟懸香來猶有雨玉化已成煙雙塚高高

起舉姜緣凄凉落照邊

合道山房作

老覺精神貴閒令壽命長古人尊養拙吾道在含
光地有山熊館天無海鶴糧久知貧賤好垂白得
居鄉

夜久采聲起颼颼滿沈寥天風吹一半散作海門
潮月出驚烏鵲霜飛入紫貂山堂寒不寐有女命
吹簫

夜深寒多露天空漸欲陰白雲如薄夢明月是愁
心友淚餘細帙妻魂在錦衾誰知詞賦客學道更
情深

未夕花全白

花謂木芙蓉也木芙蓉朝白暮紅名醉芙蓉

先秋葉半紅

竹深偏有月采小已多風紫極心長貫黃泉夢每

通故人凋落盡誰與聽絲桐

懷二配

美人相別久清夜寐難安兩影花邊暗雙魂月下
寒香猶懷抱在情以歲時寬小小諸兒女誰扶過
藥欄

夢裏過三春悲思淚滿巾月沉珠浦女花墮玉樓
人絹上容顏舊奩中翰墨新有兒在文葆孩笑向
誰親

壽尹恒復丈

一老在羅陽天留白髮長芝華先代秀菊蕊古人
香道以神仙小身從隱逸強聞時猶有夢夢向鳳

池翔

丈曾官中書舍人

隱几知何處
蘧蘧八十秋
小兒猶白馬
老子已青牛
經史為金液
衣冠在石樓
受書諸弟子
采采愧蜉蝣

冬菊

冬來方見汝
自是歲寒姿
豈敢傷遲暮
梅花更後時
雪深佳色淡
霜重落英垂
多少重陽節
爭開不自持

白髮依然短
多慚紫菊花
但能留歲晏
不敢望春華
搖落悲羣卉
芬芳喜一家
寒香吹不盡
欲寄隔湘沙

西樵作

峰峰皆內向
真似未開花
一水二三里
沿洄上紫霞
林泉多鹿跡
巖壑半人家
瀑布條條好
風吹總不斜

瀑花飛四壁
一半入空冥
時似白雲起
氤氳滿翠屏
影長風易斷
聲急雨難零
下有流杯石
莓苔太古青

多雨天湖決
魚飛下碧峰
船浮山口石
曾掛市門采
瀑布添無數
梅花積幾重
行行溪路暝
催客一聲鐘

絕頂人皆住
茶田滿一山
牛羊雲外冷
婦子雨中

閒木末潮痕濕花多石色斑峰峰可垂釣未擬棹
歌還

斷峽開青玉飛泉掛白虹光搖千尺雪聲亂一天
風臥石麕衣冷披苔鳥篆通茶人半紅粉掩映翠
林中

重至白門宿余鴻客山堂作

白下啼烏地愁人自六朝秋聲將落葉此度益蕭
蕭山鬼弄魂夢草蟲悲寂寥那知垂老客有道在
漁樵

五十

五十忽已至吾生安所歸荀卿方好學伯玉未知

非雨雪雙青鬢春秋一白衣無成空老大何以慰
庭闈

汪于鼎文治居黃山始信峰詩以寄之

萬仞丹梯上天開三海門如何落雁西嶽絕頂外

亦有蓮花尊蓮花峰乃黃山絕頂石笋日以長湯泉冬更温

嗟君兄弟好鸞鶴自相存

寄汪扶晨黃山中

仙人湯沐地天子翠微都一片黃雲裏芙蓉影有
無采聲搖玉柱花氣出香爐君愛西峰好琴歌定
自娛

萬疊翠氤氳天風吹不分飛來一片水散作四山

雲峰影花中落溪聲雨外聞紫牀將碧枕高臥羨
夫君

題席允叔山房

君家多洞壑瀑水復淙淙更欲黃山上移來石笋
在藤蘿牽上客苔蘚入幽窓况有詩篇好風流映
大江

作者今誰好知音世所希君從風雅客每得性情
微明月同高詠梅花一布衣流連當水石不忍送
將歸

贈程葛川

相見此邗溝依依紫綺裘江山才子國花艸美人

秋把酒當明月聽歌在玉勾多情如杜牧欲向竹
西留

竹下佳人席花中長者車尊壘頻至夜歌吹欲愁
予詞賦宜青歲韜鈴有素書古來雙孺子於爾意
何如

題二半閣有序

吳銘占家有半閣請予命名予卽名曰二半閣
蓋取前賢半日讀書半日靜坐之義繫以詩
吾道非禪寂猶宜半讀書絃歌娛一室風雅變三
閭坐久生明月吟高入紫虛流光應自惜不是愛
閒居

方湘九年十五時割臂肉療其伯父疾詩以贈之

嗟君年十五肉作返生香伯父恩難報仙人藥不
良血花紅在臂刀口冷含霜一瓣丘山重皇天鑒
未央

過梅村作

山是羅浮好梅花有一村

羅浮有梅花村如何千萬樹移

此作名園石上雲多竇花中水有源人言眾巖壑
更似謝公墩

一水灣環入花深自不知舟因梅片重杯以鳥聲
遲石隱陂陀勢烟生洞壑姿阮公多子姪更有竹

林期

冒雪同郭臯旭入鄧尉山中探梅

一夜吳閩雪催人入洞庭花先玄墓白柳未太湖
青鼓棹乘春水尋鐘上翠屏微微光福月相與宿
空冥

枝枝連鄧尉香繞故人家隔歲冰含萼當春雪吐
花凍凝千嶂月晴作一溪霞未得同栖止高堂念
白華

同諸子探梅玄墓

路從東瀆入春半雪猶深素影迷千嶂幽香得一
林采開湖口小竹覆洞門陰稍待天晴暖籃輿更

遠尋

濛濛千萬樹香在未開時雪裏人空望風前自不知
山光寒更出水氣暖方滋十里采杉暗重來月
滿枝

茫茫花雪裏萬樹望疑空自有幽香度何妨積素
同山晴猶似月水冷每生風多謝流鶯好衝寒出
谷中

不須殘雪盡綠萼一叢開豈欲孤榮早其如淑氣
催枝寒偏近水片落不沾苔採摘休盈手留香與
客來

望太湖山色作

湖山三萬頃最好是晴春秀色無南國清光自美
人花開香澤滿雨過髻鬟新處處莓苔上都疑響
屨塵

漁洋探梅歸至東西橫塘作

山寒尋未得一樹忽臨溪光透采間雪香生石上
泥鶯聲留客久鷺影逐人低隨意穿橋去橫塘東
復西

題鴛鴦壙有序

崇禎末長洲有楊氏婦者其夫倪士義歿婦使
工鑿鴛鴦二字壙上遂自剗今合葬虎丘稱鴛
鴦壙太倉顧涇載其事虎丘志中予覽而感焉

血濺良人墓，嬋娟事可傷。闔廬無此劍，紫玉不成

香。俠烈光吳岳，梁張種常稱虎丘為吳岳之神秀流傳自野王。陳

野王有虎丘山序千秋蓮沼上人見，紫鴛鴦。

大兒

有知才五稔，無恃已三年。祖母書頻教，先公道未傳。枯花宜歲晚，梅實喜春先。兩弟方孩乳，提攜總可憐。

陳生新婚贈以詩

忠孝家風舊不承，有雁行謝昆高玉樹王友富青箱。十月迎桃李三星下，鳳凰鷄鳴應黽勉天際共翱翔。

初春散儒堂作

風以迴南煖，春從昨夜過。紅飄梨葉亂，白綻李花多。稚子詩書早，慈姑笑語和。自嫌雄志在，刀劍日摩娑。

最好立春寒，風吹雪不乾。花光猶未滿，鶯語已先歡。養薄慚牲鼎，飛高羨羽翰。催人小兒女，身漸及欄杆。

花開知客至，鳥喜識春來。掃徑留紅葉，橫琴在綠苔。寓言師大易，沉飲見狂才。收拾風前淚，文章任草萊。

獻歲花爭發，山茶與杜鵑。煙含春色薄，雨洗日光

鮮未少題詩地應多學易年黃鶯能勸酒一一到樽前

少小

少小縱橫志其如命不辰鶯悲春色去花笑白頭
新詞賦難求食圖書欲與人十歌藏一哭斯道日
酸辛

漢口訪徹上人蘭若

漢陽無別樹祇有柳依依一片湖光裏參差映夕
暉樓臺含雨暗鐘磬吐風微却月城邊水沿洞暮
不歸

白髮

白髮何妨早神仙不駐顏無憂惟紫菊有道是青
山親老難爲客家貧易掩關玉琴持貰酒餘得半
牀閒

蔡璣先鉉升攜過東園看菊作

相攜秋色裏采菊步遲遲故國啼鳥在離宮蔓艸
知人間因有道歲晏亦多思願與鍾陵樹蒼蒼似
昔時

江左重來日蕭條益愴神黃花猶有汝白首更無
人意氣期之子文章託此身溪流如有意曲曲入
西鄰

溪亭懷亡友韓石畊

隔溪人語寂花露滴清琴不有青天月誰知此夜
心階庭微葉落懷袖片雲深思子淚如水潺湲流
至今

荅藍公漪

吾友多能畫藍君亦虎頭長將千尺水瀉作五湖
秋天上無黃鵠人中有白鷗桃花開口笑笑我稻
梁謀

日夕催春去流鶯奈爾何離愁江水滿鄉夢嶺雲
多天未生薇蕨人空老薜蘿與君歸及早白首一
婆娑

秣陵春日集蔡氏園亭分賦

兄弟鴛鴦好迴翔在紫虛清和二日後文采六朝
餘柳拂先公席花迎長者車門前溪一曲誰憶武
昌魚

三月晦日與諸子分賦

一日猶青帝春光未覺非飛花雖送送啼鳥自依
依酒且如流水吟須到曉暉明年開歲後卽共對
芳菲

雪中陳挹蒼饋酒

故人念風雪相送一尊來是日梅花下中閨錦瑟
開大歡惟稚子遠望正高臺期爾秦淮曲春晴共
舉杯

題太倉張氏學山園

城裏多丘壑名園更學山何來峰十二風雨恐飛
還抱石雲長冷流花水不閒人疑太湖上銷夏第
三灣

先公真仲蔚白首此經營爲養司空志因高處士
名風多長化水雲白欲開晴巖穴相句漏天然一
石城

天下無山水愚公有子孫昔移石笋至今似蓮花
峯尊采檜干雲亂鳧鷗得雨喧家風高可述不在
辟疆園

不必天風起采多自有聲誰從人籟外最得夢魂
清果落疑冰響梅開似月明主人餘逸興還與聽
啼鶯

具區山中作

我愛鴟夷子風流在五湖美人留一鏡終古照三
吳白鳥烟來去青峰雪有無梅花千萬樹不覺一
春孤

贈曹十

有美茸城客新多嬌女篇惠芳詩總好織素畫俱
妍白蕩三湖水青峰九疊烟室人同命管紈扇世
爭傳

贈茅天石

茗雪溪邊客丹青世所無以予爲屈子因作遠遊
圖舊業餘天目新詩滿太湖繇來名下士多半在
菰蘆

綠樹

江南芳樹滿色似水波鮮一半爲楊柳風吹綠漲
天長因新葉好益念故花妍黃鳥藏何處聲聲總
可憐

秣陵張氏園看黃牡丹

花亦有黃裳移從上苑旁枝枝新御氣葉葉舊天
香露滴成金液風吹到玉觴不須誇異種此土本
中央

雪中送人入太湖作

采香涇太遠雪重壓漁舟暖欲洞庭去晴先胥口
留梅花堪舍命明月不容愁一片湖山裏夷光更
可求

春寒多水雪光入鏡中無月上花潭薄烟含竹嶼
孤香知開萬樹影尚隔重湖白首須來往人間此
玉壺

寄懷王伯佐

陰晉標雙峯弘農會兩河關門春水濶馬首白雲
多起舞當仙掌歸飛得鳳窠向來張飲地哀樂奈
君何

題李箕山畫

汝畫匡廬好峰峰紫翠流長疑三疊水飛出九屏
秋天與高人妙神從太素求烟雲揮灑去詩卷總
丹丘

別高氏兄弟

隋宮落日時相見問新辭愛我雷陽曲風流似竹
枝月催連夕飲花作一春期芳艸牽人去茫茫失
所思
不知公子意何以解離憂自向江南去長含江北
愁雪雲連兩岼風葉滿孤舟亦有紅橋好踟躕自
不留

燕中春日作

一雨消冰雪春光萬戶開金貂新子女花柳舊樓
臺長樂鐘仍度昭陽月復來空餘御溝水流恨到
龍堆

大都宮詞

楚舞復吳歛風流作帝圖阿房頻止鳳太液復歌
鳧小妓玉條脫中官金僕姑不知高力士猶憶上
皇無

煖殿開春宴才人賜錦袍舞低吳蛺蝶歌倚鄭櫻
桃學士調花曲闕氏按鳳槽只愁金漏短日出未
央高

具帶盤龍錦垂髻墮馬粧漢宮丹鳳女胡地白羊
王夜醉葡萄酒朝開蹋鞠場邯鄲諸小婦雜坐弄
笙簧

佳麗徵南國中宮錦字宣紫宮雙鳳入秘殿百花
然卓女方新寡馮妃是小憐更聞喬補闕愁斷綠
珠篇

白馬飾金羈琵琶再撥時昔曾調玉樹今復妬蛾
眉紈扇秋終棄蘭臺晚易悲何如若耶女采葛作
黃絲

朝來逢百騎蹀躞御河堤小隊芙蓉簇嬌歌楊柳
齊錦裝春箴艷貂壓翠鬢低遊獵知何去闕氏在

苑西

贈魯山人

羨君遊海嶽縹緲羽衣輕北斗斟元氣崑崙采玉
英千金若草芥一笑成功名誰似魯連子高風振
趙城

別吳統持

君平休棄世市肆亦容身黃老何須學英雄自有
神雲生長水白花發曲臺春寂寞鈎簾下行吟念
楚臣

懷梅上人

此日惟禪寂干戈滿海濱悲歡能累道貧賤易違

親孤月先秋冷羣峰過雨新一燈林壑夕遲我作
山隣

雪

一時羣籟寂天地入鴻濛萬里瑤華落寒光望欲
窮春傳梅信早夜入月明空有客當樓坐淒清洞
壑中

過徐州作

百戰悲豐沛羣雄問草萊斬蛇畱大澤戲馬失高
臺山向彭城出雲從泗水來蕭條王氣盡父老有
餘哀

柬戴生

此日天涯意艱難莫可論死生慚往哲貧病負中
原野月含霜冷山泉帶雨渾祗應返廬嶽鸞鶴自
相存

黃河舟中作

河流黃日月萬里客愁中天入清霜苦人過白草
空暮心生寂寞春氣破鴻濛吾道宜滄海乘桴孰
可同

舟泊宿遷作

月出黃河白微茫帶晚霞一簑同白鷺雙鬢似蘆
花亂火歸漁艇寒雲覆酒家悲來思買醉不忍賦
懷沙

鄴城

浩浩漳河水迢迢魏武年歌臺餘蔓草戰壘沒寒
烟興廢雖無定姦雄自可憐空令銅雀妓畱恨綺
羅邊

保定客舍

城樓吹角罷歸客逐斜陽風急鷗翎脫水堅馬骨
傷通侯亡鐵券故將典銀襠握手天涯路沾衣淚
數行

鄆邑

塞北三關沒江南四鎮空至尊頻按劔元老獨臨
戎龍起黃河雨狐鳴白艸風千秋臺吸喋回首鄆

城東

過晉太尉劉琨墓

扶風歌未罷國勢日倉皇辛苦盧從事相依在晉
陽笳吹邊地草月滿戍樓霜遺墓東安縣蕭蕭徧
白楊

舟次河西務

千里桑乾水分流至直沽日黃含朔氣潮白沒平
蕪井邑歸龍戶樓船指帝都東南頻轉餉猶自缺
軍需

謁文丞相祠

蕭條柴市口就義憶先賢碧血歸無地丹心痛入

天武侯師未捷箕子道空傳終古宗臣淚斜陽麥
秀邊

玉熙宮

玉熙宮裏月幾夕炤龍顏過錦陳春戲迴風舞白
鵬愁從河內亂不見至尊閒流落龜年在相逢兩
鬢斑

哭劍

七寶雌雄劍 先皇掌上飛當時刃公主血濺翠
雲衣入地雷霆鬱冲霄日月輝應同周駟馬化作
兩龍歸

西苑

芳湖荷芰滿舊映洗粧樓夜月迷遼后秋風失御
舟管絃無盛事花草有深愁落盡行人淚興亡總
一丘

經鞏華城

秋風鞍馬苦獨過鞏華城龍瓦飛空殿鷓旗折大
營奚兒彎石弩趙女割銀箏詎念良家子淒涼出
塞情

銅馬門

銅馬門前望風沙慘不開昭王無舊墓郭隗有荒
臺斷鴈衝雲去妖狐渡水來淒涼蒿里上多少霸
王才

塞上曲

漢壘盧龍固燕城涿鹿雄陣雲橫海黑獵火照天
紅大將披金甲妖姬餵鍊驄控弦諸種落強半是
遼東

八月漁陽外淒淒塞草腓滿城炊白骨幾處擣寒
衣細雨連狐嘯驚風斷鴈飛長安多戍婦可復夢
金微

亭障三邊接風沙萬古愁可憐遼海月不作漢時
秋白草連天盡黃河倒日流受降城上望空憶冠
軍侯

灤河諸將士十月少征袍大雪僵花馬陰風折寶
刀水營朝浴鍊沙市夜巡槽十載榆關戰誰知汗
血勞

萬古燕雲淚千秋戰伐場黃河流不盡白日到無
光殺氣隨風轉邊聲入夜長軒轅臺已沒何處望
漁陽

太行天下脊萬里翠微寒日月相摩盪龍蛇此鬱
盤雲橫三晉暗水落九河乾亘古飛狐險憑誰封
一丸

寄潘陽剎禪師

驅馬今何適淒涼歲暮間心懸青海月淚灑鍊門
關雪窖人應老遼東鶴未還近聞隨部落又徒賀

蘭山

漢家臣妾盡餘爾牧羝人自食天山雪長懷上苑
春短書無鴈寄愁髻帶霜新夜夜聞笳吹因君淚
滿巾

尸上人將出渝關贈之

不及遼陽鴈乘風渡黑河偏愁矰繳密詎畏雪霜
多歲月愁中盡滄桑夢裏過孤心寄明月夜夜炤
蓬婆

弔袁督師

袁公忠義在堪比望諸君百戰肌膚盡三年訓練
勤涼州無大馬皮島有驕軍一片愚臣恨長懸紫
塞雲

送葉氏郎

八尺渥洼驄龍花染汗紅功名思塞北豪俊結山
東巨麓秋雲滿漁陽白日空肯令班定遠燕領獨
稱雄

贈某上人

世外交難得如師洽素心疎狂元有道哀樂亦同
音野徑通人小禪枝宿鳥深願君如海月長為照
彈琴

支遁山非買深公莫笑人禺陽新有主帝子久無
春瀑布無餘說明霞亦是塵何時捐物役鸞鶴與

爲鄰

上人新得峽山飛來寺

且復憐神駿何須戲季龍圖澄非正法支氏亦真宗塵尾懸河漢獅聲應鼓鐘風流餘逸少相賞更雲枯

少師殊不義畱恨在巖阿吾道先名教斯人且嘯歌曉將雲氣散春使鳥聲多麋鹿饒甘艸分人亦太和

壬戌人日前一日予得一子名之曰泰先是辛酉除夕有友人爲予筮得泰謂必生子故以泰爲名云

吉日先人日熊羆墮地聲剛從正月長泰作小時名飲乳兼雙母分書止一兄婚時須舞象吾亦七旬成

五十又三時生兒是次兒承先曾四子爲後且雙支道長欣逢泰文明望作離阿孃珠在腹每覺媚生姿

春人曲

春從江上至先入美人心笑是桃華好愁惟綠艸深竹枝傳舊怨團扇寫新吟欲寄離居者殷勤託翠禽

舟入陳村有作

山光因雨發林氣得風清啼鳥元無意當春自有

聲溪隨花路遠雲向水村明一棹斜橋外歸時月
已生

一冬

一冬嫌太煖春至乃微寒雷未三陽發冰先十月
殘氊裘今歲賤燈火昔年歡嶺海誅求盡哀鴻未
得安

春日懷故園作

春光生雨後萬象喜新晴霧以南風盛雲含朔雪
明江干愁作客谷口憶歸耕十畝無先業終懷鴻
鵠情

髮白

髮白愁兒女情多愧聖賢無成非事業不病卽神
仙孔雀沙爲浴梅花石作田河清如可俟堅卧更
三年

喜白上人至

春寒因有雨冬暖竟無冰天向炎方變人愁毒氣
蒸鶴來明月寺花寄白雲僧二月山如錦如何興
未乘

林赤見以穀皮紙見贈予將以爲衣賦詩志
喜

山中尊野服穀紙亦宜人吾粵多奇布無如此更
珍染成黃栗色裁稱白華身感子持相贈輕寒及

暮春

春思

參參西苑柳拂水最多絲歲歲嬉春節風流不自
持無人猶獨舞有客正相思欲折長條寄天涯不
可知

黃鳥

依依窓柳下黃鳥解親人有意頻催曙無情亦怨
春髻沾紅雨溼衣染綠烟勻絕似吾嬌女綿蠻語
不真

聞人述鹿馬山感賦

山在昌平州之南乃田貴妃所葬甲申三月

烈皇帝后崩其遺臣某因啓貴妃冢而葬一梓

宮其中予嘗爲西山口攢宮七言詩三章今復

弔以五言一章云

如何龍鳳穴乃在貴妃園君弒難書葬臣亡莫報

恩三良惟內使謂王之二井東西自高原杜宇聲

聲血行人久斷魂

雉子

斑斑雙雉子一者白花男並蒂蒲桃髻連枝玳瑁

簪鸚哥懸綵架荔子貯花籃日夕供孩笑蘭飴祖

母舍

兄妹生同月堂前五見春明年從外傳不日望成

人黎錦裁衣豔洋珠作帽新爭花喧未已呵喝忍
教頻

三字經頻教童蒙正可求聰明如有種典籍卽無
憂舐犢情雖切聞雞舞未休及時完子女鞭弭遍
神州

移家返沙亭有作

浮雲亦有盧歸與老農居半畝林塘外三春風雨
餘將乘無事日更讀古人書咫尺先公墓采間且
荷鋤

送蒲衣子往潮陽有作

越鳥無非翠蠻花只是紅何須命蘭櫂更向海陽
東幸得園林接方期嘯詠同殷勤爲此別歸日及
秋鴻

送客

君行驅疋馬梅嶺踏梅紅望望無南鴈依依是北
風徘徊燕市上慷慨酒人中自許惟鴻鵠何時奮
翼同

代謝悲人事依依只舊林交惟貧賤好情以亂離
淡勳業偏宜晚行藏且在陰黔西高臥處杖屨待
相尋

代人送客

交能金石固不惜暫分離終始期高義艱虞記昔

時帆開珠海早馬度庾關遲莫嘆梅花樹無春到
北枝

寄贈九江曾丈并以爲壽

九江臨海目

山色似朝霞歲晏餘三秀林深有

一家早收多雁膳春養亦魚花不覺成高隱清霜
滿鬢華

暮年悲老驥千里豈無心劍有仇人字詩多猛虎
吟繭蛾常八熟采子已三尋愛老還朱槿枝枝拂
玉琴

秋夕懷歸有作

秋從梧竹起一夕作私聲葉亂偏宜雨蟲悲欲到

明將歸愁遠道未老厭浮名耿耿茲魂夢何因向
穗城

家園示弟作

不能長教育慚愧作人兄世亂詩書廢家貧骨肉
輕無荒耕種業且得水雲情努力持門戶予方事
遠征

壯志難凋落名山且隱淪登臨非孝子騷些豈先
臣朔雁能隨暖南花不待春明年逢甲子日月喜
重新

讀史記有作

六國讐終復兇威豈得長人勞虛七首天定在輜

鯨蛇斷真人起狐鳴成卒張楚中多俊傑最智是
張良

天意何爲者二年兩彗星無心在華夏有力卽朝
廷雷雨交雖始玄黃戰未形白頭餘一女不字守
天經

猶存人種在多難五旬餘爪髮皆神劍心肝是素
書時來終大任事去且端居山色青青好衰顏愧
不如

當年常貫酒抱頸泣文君作賦娛紅粉彈琴對綠
雲歲添愁脉脉春使夢紛紛莫作鸞皇嘯泉臺定
不聞

初秋春山作

秋聲猶未起暮氣已生寒一葉夢中落片雲衣上
乾無才從寂寞不義亦艱難疏水平生樂浮雲一
笑看

靜去忘朝暮庭空一葉驚香焚消雨氣筆落起秋
聲林鳥欲無語山花安用名月寒頻化水相照有
餘清

香好烟多紫花寒色更紅書成秋爽後夢盡水流
中喜客惟山鵲愁人是草蟲雨抽蕉葉大片片映
簾空

磴道交烟竹陰陰掃不開人惟盤石坐客是白鷗

來葉盡山無影花多水有苔
松脂新服食白髮莫相催

燈影搖黃葉樓陰壓白雲
風來山雨合日出水烟
分蘭暗香無定松高響
不聞幾宵涼月下長嘯憶
離羣

雨影含明月幽幽萬竹中
未懸秋漢上猶與白雲
同氣冷先成水光微亦畏風
渚邊吟望久驚起一聲鴻

未晴知有月空外已光流
忽爾天風起吹來滿石
樓尊先開白露琴待響
高秋衣薄驚寒射林塘不
可留

再弔袁督師

漢家恩未薄竟失李將軍
碧血流燕市丹心結塞
雲封侯原有數破敵豈無勲
愁見盧龍上黃榆覆一墳

一自誅莊賈羣公謫樂羊
揚威幾虎視持重可龍
驤玉帳兵機密金牌國恨長
可憐軀七尺不得死封疆

遼薊應居守分兵援帝州
情歸吾可擊深入彼難
留計拙遭讒小身殲快寇仇
長城從此壞權相欲何求

載讀愚忠紀淒然淚數行
爲秦誅李牧救魏少馮

唐三至傷慈母羣陰奪太陽錦寧功業在一戰作
金湯

勞臣遭反間蠢爾善愚人馬喋三韓血旗揚九塞
塵丸泥難守險集羽竟摧輪一自鑄鏤賜無人更
致身

弔張副使春

嗟君提鐵騎汗血洒窮邊力盡凌河戰身歸大窖
眠蘇卿心貫日衛律罪通天藁葬陰山道單于亦
爾憐

節旄零落盡饑凍在遼西馬賜單于弟羊烹都尉
妻雪填青海闊天壓拂廬低往日中郎將艱貞與

爾齊

題蔡五秣陵春興詩草

羨爾烏衣客才華冠一城鶯花當上巳桑梓是留
京地與青谿近風吹白袷輕新詩師謝眺鵝鵲月
同清

送明逸人

孤雲誰得似萬里獨無依處處青山好遲遲故國
歸亦知春色盡不忍夕陽微漁父津休問桃花有
是非

寄祝子堅丈

羅浮峯四百盡讓老人峯箕踞石樓上蒼蒼煙翠

重其旁爲玉女峯以下名是黃龍洞仙客相期甚君
來更植松

東南民獻盡一老在江濱碩果開天物芝華翼漢
人歲將逢甲子天已厭庚申八十多神智先求萬
曆臣

喜姜汝臯自越州至

一片鏡湖月清光在我心隨君至珠海相照滿秋
林復有玉琴好平生山水音柯亭古時笛不及此
高深

韋氏溫恭甚威儀總玉珂家風多諷諫祖德更絃
歌子舍辭秦望王臺問趙佗白鷗相送送中道返

巖阿

並馬蕭梁寺菩提見古春同遊光孝寺花花天女

影葉葉法王身月皎雖非物雲香亦是塵徘徊當
粵秀更欲上嶙峋

春明歸鑑水歲盡向崧臺華白因無欲裕高爲有
才將閒留日月以止待雲雷更與杜陵子謂蔣丈
南浮訪我來大鴻

山堂夜坐忽憶彭蠡湖遇風有作

揚瀾湖風大作舟盡上天飛白浪吞廬嶽黃沙捲
翠微長年猶失色狂客竟忘機此夕松聲裏波濤
勢未非

伍子胥

鼓腹閭門日佯狂一布衣壺漿漁父與骸骨大王
歸破郢身應退鞭王事亦非父况讎已復被髮效
鴻飛

淮陰侯

淮陰當未遇一飯亦無才天欲王孫餓人慚漂母
哀釣魚城下去帶劍市中來笑謂晨炊者英雄被
爾催

艱難惟一飯天肯與王孫艸昧多如此英雄不忍
言漢興因婦女臣節在壺殮誰分宮前艸離離是
血痕

漂母祠

一日王孫飯千秋漂母名壺漿誰可報俎豆自含
情河口吞淮濶潮頭出海平英雄無限淚都向廟
中傾

七尺空長大茫茫在艸萊可憐諸母漂只有一人
哀不望真王報難留猛士才子房應導汝同訪赤
松來

諸葛

諸葛當年事依稀似望諸可憐出師表不讓報燕
書涕淚難為讀功名不可居英雄天亦如未是將
謀疎

太白祠

翰林餘俎豆宮錦至今香光復真繇汝功名亦可
王山川增氣勢風雅有輝光一片郎官水風流未
忍忘

過太原傅丈青渚宅賦贈

唐氏遺民在憂思正未央故人期飲食良士戒衣
裳苓采今無地桐封舊有鄉叔虞祠下柏與爾共
風霜

下馬晉王宮山河感慨中無成空老大不死卽英
雄汾水城堪灌并門騎易通思淡當歲暮且詠有
唐風

早秋客中作

秋含片雨來落葉一聲催蕭瑟瑟爲客蒼茫畏上
臺夢隨微月去魂逐冷風迴不及清猿甚無情得
盡哀

戍婦怨

雨過鳳凰城含愁月不明玉關無限恨盡在擣衣
聲露網蜘蛛重風羅蛺蝶輕那能如蕙艸歲晚尚
含榮

對月

一片含空雨秋光水上多無人臨素鏡祇自弄金
波宿鳥驚寒起流雲逐影過露華霑濕盡猶自御

織羅

東季偉公

以我年先汝參差廿九霜家貧因意氣命薄是文章及此崦嵫暮彌令蘭杜芳殷勤向三友求益正多方

贈鄭儋州愚公

自罷儋州守歸來食苦貧生黎多化妝熟結少貽人詞賦畱立國江湖友白民補官應有日且醉荔支春

儋州古之立國

秋蟬

梧桐一兩葉猶有暮蟬棲未忍辭風露清冷只此溪聲將泉水咽影向月明低一片碧空外行雲更不西

蚤梅

夜半暖風迴凌晨一樹開雪花千萬片化作蚤梅來吐艷臨粧鏡飛香過酒杯猶疑殘月影點點在蒼苔

望月

秋光在何處一半出斜曛與水寒相射和煙白自分螢流七月火魚食一天雲心憶乘鸞女簫聲不可聞

劉參軍貽予白石盤牙香用來韻奉答

一片端溪出人同白玉看承君一追琢遂得作珠
盤氣以香爐暖光含素鏡寒方圓有深意欲報碧

瑯玕

白石盤

生長衆香林薰衣之水沉得君爲越客相贈比南
金待取銅鑪器還張綠綺琴茅茨邀枉顧蘭臭話
同心

牙香

送許氏昆弟之惠陽

之子蘭陵客來從季子鄉明朝向東莞莫不至羅

陽

溪名在羅浮山中

山是蓬萊股

羅浮乃蓬萊一股

梅爲花萼香

羅浮有梅花村

毋令鮑與葛笑汝事金裝

菊

今年芳更晚要待一陽來半與梅花似全於至日
開寒香因暖得秋色以春催采摘朝盈手殷勤泛
玉杯

竹色

竹色樓前滿枯聲屋後多風吹山影去雲拂水痕
過秋使神明爽春將笑語和醇醪君不飲當奈好
鶯何

香柚

最是增城柚天寒益有香那能成玉液只是飽清
霜一樹殷勤數三冬次第嘗楚臣知有此應亦頌
芬芳

初冬鹽步江上作

日暮水逾冷微風吹有霜白鷗飛不去心似愛斜
陽木葉有時落鱸魚何處香隔林柑子熟乞與老
親嘗

海色長如暮陰陰雨氣過白鷗雙影少漁父一人
多蠓味寒逾美鶯聲暖始和菰蔣吾老矣無恨與
滄波

人家全不見總在荔枝洲蟋蟀那知暮芙蓉自作
秋山隨蒼樹出水逐白雲流漁父無心者蘆花使
白頭

懷嘉興周青士繆天自

嘉禾高士在門徑盡花林不逐鴛鴦去那知菡萏
深一從船上別三向鏡中尋長水連雙帶牽人日
夜心

嘉興有鴛鴦湖有長水有寶帶錦帶二水

一棹自秋涇穿橋出杳冥朝辭學繡里暮至弄珠
亭不寐因明月相思是洞庭湖中山影少祗有一

螺青

水名

燕梢船太小祗載美人心影向花中得香從鏡裏
尋白鷗分獨宿黃葉代悲吟幾夕當明月因君一

鼓琴

燕梢小船名鏡香亭在嘉興府城西北

往日招尋處春波與月波桃花西子里錦帶大夫
河玉乳秋梨好霜螯凍蠓多落帆亭咫尺清夜亦

相過

春波橋名月波樓名桃花里在城西玉乳梨產橋李

知已

知已多溝壑吾生日已孤但令長白首不敢哭窮途
雪重松頻折霜深草未蘇巢邊黃葉盡寒絕一啼鳥

幸得長貧賤年年此舊林布衣無不可蓬戶一何深
月好宜長嘯風清更玉琴茫茫興廢事天在一人心

天意猶相惜先朝一布衣平生雖未負白首竟何歸
故國餘禾黍空山少蕨薇勞勞多著述老去總知非

陳君疇見贈畫扇

君為南海客嘯詠越臺陰詩筆珊瑚樹書堂翡翠翠
林風流多繪事幽獨少知音遺我邊鸞扇珠毛設色深

以莞香結贈呂黍字擊以詩

百年香有膽生結一精華得日珠官手來從莞女家
但令存一氣不必作雙霞日夕君懷袖人疑處處花

贈祁七奕儀水巖研

辛苦羚羊峽東西割紫雲青花因水見白葉與天
分沐浴乘佳日精華得大文裁成風字好珍重一

貽君

五十五歲生日有作

五十五秋前無聞愧昔賢將過稱艾日未及象著
年學易徒為爾知非尚未然杖家吾不敢親在卽

神仙

碑雅五十象
艾六十象著

皇天眷老親八十一年人孺慕今方始兒啼日以
新松枝宜晚歲萱艸更長春為壽吾何敢劬勞念
此辰

過郭文寓廬有贈

小君年十歲兄事每稱公相就忘賓主相依愛土
風憂勞猶隴畝栖宿已雲鴻心事妻孥識遺安計

未窮

詠管寧

生長惟潛逸棲遲豈守高閨庭閒出入几杖未煩
勞語客惟經典依人自羽毛一匡思祖業慷慨在
蓬蒿

木榻穿當膝相隨未老前潛龍成德日遼海說經
年裙薄冬添布巾疎夏脫綿孤臣餘艸莽匪石一
心堅

羅浮雜詠

松風無大小吹得石樓飛一片水簾影紛紛落翠
微月為玉女鏡花是麻姑衣寄語大蝴蝶相迎羽

客歸

空外日氤氳茫茫四百君雨將雙嶽合晴以一泉
分石柱支青壁香爐吐白雲穿林深淺去驚起碧
雞羣

玉女老人邊窺人出紫煙鏡臺一瑤石裙帶兩飛
泉明月白成水梅花香在天楓林蕭瑟甚夜半尚

聞蟬

玉女峯在老
人峯之側

峰路時時斷翻嫌瀑布多水浮蒼樹去山逐白雲
過餉客惟朱草牽人是綠蘿踟躕石梁畔心柰欲
歸何

菊

兩月含苞久三冬吐蕊長花乾同白露葉濕似清
霜有日那能暖非時不用香籬邊自榮落誰見此
孤芳

未敢違霜露宜寒故晚開重陽嫌太早白鴈莫相
催冉冉辭秋草依依有早梅炎方無月令嗟汝後
時才

不是花難發炎洲故晚寒苦心嫌自見佳色畏人
看地煖非吾性山深正所安微紅有霜葉采采作
晨餐

秋收後作

漸見窮陰積霜因白露晞寒教梅色淺暖使菊香

微十畝男功畢孤村歲事非幾家滌場候雞黍有
餘肥

喜母庭前織絲絲似有心人因黃菊至路向碧溪
尋釀酒蟬鳴稻娛賓鳳唳琴月明田水滿一嘯白
鷗沉

賦懷塞外友人

塞外知寒絕淒涼黑水涯貂毛那受雪馬肉不沾
沙風斷三秋草冰開二月花催人雙淚落最苦是
清笳

得風貂更暖不必著重裘食肉身難老彎弓汗便
流黃羊燒大雪紫兔射高秋屬國歸須晚於今未

白頭

江皋

閉戶過中歲清貧亦已忘耕鋤無旦暮勤動是文
章病使秋魂冷愁令白髮長妻孥亦沮溺相耦水
雲鄉

夜寒猶作雪春暖已成煙黃鳥啼山口桃花笑水
邊琴來三益友酒酌一高年親戚多情話殷勤在
白田

江皋春未半紅滿木棉花士女祠南海帆檣出白
沙蜃開朝暮市魚逐水天霞最愛垂楊處鶯聲第
二家

翠微春更濕烟雨欲無山白鷺一溪影桃花何處
灣漁村疎竹外古渡夕陽間田父不相識相隨谷
口還

蕉利村春望

喬木村村出榕陰接翠微夕陽雙渚映古道一人
歸烟火暮猶少牛羊春未肥愁心似鴻鴈處處逐
烟霏

望望烟波上芭蕉滿海天人家龍眼國生計荔枝
田日出鶯花裏雲生鷄犬邊捕魚乘水節一一放
鼠船

木棉

花朝猶未至海國已春多十丈攀枝影如霞逐水
波香薰么鳳甚紅柰美人何歲歲祝融節祠前照
綺羅

天南烽火樹最是木棉紅花發炎洲上光連若木
東珊瑚枝幹似翡翠往來通朝夕羽毛染爲巢朶
朶中

壽尹丈

南國長生樹無如細葉榕橫斜炎海上絕似老人
峰太古一黃髮婆娑煙翠濃林邊有春酒鸞鶴盡
相從

贈別潁川劉子

君昔蘇門隱移家自汝陰相逢長嘯客相引夏峰
深白日依毫素流泉託玉琴清虛抱天識軒冕幾
沉吟

君常就處上孫鍾元
居蘇門之夏峰村

畫長

畫長人事外琴靜一溪風親客勞蛛子宜男得鹿
葱柳疎烟易度花密月難通不奈流鶯好聲聲綠
酒中

浣花

浣花成老大人道是花翁白鷺浮沉者年年浦淑
同猶令玉琴在不使石牀空酌酒無朝夕春顏任
意紅

奉答于畏之枉顧沙亭之作

吾家傍海濤煙管一峯高秋鑿山香結春收水翠
毛承君來浦口繫馬向蘭皋風俗知南屈家家學
楚騷

一姓分南楚三問此大宗君尋苗裔至禮向逐臣
恭湯沐多香草田廬繞碧峰遺音哀怨在愁殺竹
枝儂

草沒山邊宅泥深海上城一家衣隱德十口食才
名歌吳難消口文章易養生讀君新樂府感激有
餘情

白首因周易君平棄世時羞將黃老術去作帝王

師高尚無吾友艱貞與爾期毋忘雞黍日二子在
東菑

喜王阮亭宮詹至粵卽送其行

旌節從天下光生大庾春漢宮鴻鵠客齊國大風
人翠羽飛成路梅花踏作塵相迎千步草香更滿

江濱先生濟南人

南來祠水帝光景動扶胥海市空中起神山水下
居天浮元氣外地接大荒餘欲見仙人跡章丘是

石閭章丘在南海祠之右

漢臣儒雅甚詹事復韋賢望秩分南海承華別朔
天越王烽火樹蠻女素馨田景物春無數娛君鬱

水邊

文采光南武聲華動越裳花重封錦石水更擲沉
香去恨燕關遠來愁漢塞長王程不可緩空見荔

枝黃

海味初南食連朝玉筋香茶靡番女露軒曠越人
霜月滿珠多肉天寒蠓有黃知君因異物一一紀

炎方

清絕惟風雅人欽子大夫自然金橐少亦復斡珠
無草木多為狀山川細作圖持歸贈知己不減女

珊瑚斡珠卽慧苡

豈意京華別重期雁翅城山公勞小輦姝子愧干

旌出處填笮合文章羽翼成他時思辟穀莫忘紫
芝榮

洞庭七十二君獨愛漁洋自有梅花詠彌令笠澤
香鼓鐘才子國膏潤美人鄉辭客知誰似風流一
代長

相逢黃木口相送白蘋洲愁絕三江水東西似御
溝沓潮爭上下靈嶽乍沉浮船去教風引還來看
蜃樓

散帶白雲林狂歌一代心無人問山水之子自清
音青歲早知我泠泠能鼓琴離鸞將別鵠三嘆使
情深

送高廷評

相送白雲心依依似暮禽欲隨帆影去直至泖湖
陰廷尉風流美炎洲景物深他時山與水莫忘故

人琴

高華亭人

自作季鷹鱸鱸魚香至今歸舟經白蕩莫卽愛秋
林夫子且兼善平生予所欽蘭言在懷袖三歲益
情深

過鍾氏園

竹裏行廚小相留一舉觴越人魚鱸美蠻女蠙羹
香解帶乘春暖開簾及暮涼主人棋興好移局過
飛梁

送湯氏兄弟歸建昌省其尊人惕菴先生時
先生八十餘矣

遼東嘗作客皂帽識而翁饋食先人外談經弟子
中君持名父命人挹逸民風相見猶嗚咽林泉正
道窮

海內誰華髮天遺一老多君歸親几杖莫復出煙
蘿朱萼當春好黃花奈晚何龐公賢父子招手鹿
門過

送曾止山

英雄誰得老天意在吾人但使羊裘在何妨鶴髮
新花留貧賤日酒送亂離春待與清秋鴈重來問

白蘋

野寺鶯花外相逢淚滿巾猶多天寶客已少永和
春龍去悲明日天迴望此人吾衰何足歎勉作采

芝臣

時三月十八日
故第五句云云

勞勞南北路蓬轉恨車輪白首空爲客黃金不識
人菱花能向煖菊蘂亦開春小別還惆悵相知日
以新

棟亭詩爲曹君作

苦棟先人樹婆娑只此中枝枝桑梓似葉葉蓼莪
同攀處樓烏滿啼時落月空非因霜露冷悽愴小
亭東

送沙子雨浮海之日本

東浮窮日出海船望如山五月開洋去三冬越國
還省親賜谷外題賦島巖間若木花連葉朝朝為
我攀
繞指真柔甚吾思日本刀雌雄期作佩長短要吹
毛甚欲求徐市從君上白艚平生浮海志夢裏是
波濤

為家姑壽

姑善女人醫

吾家一鮑姑遊戲鳳城隅衣化車輪蝶丹成黍米
珠神仙多玉女弟子總鸚雛戴勝春光裏垂腰髮
尚烏

贈成農部

閎閎雄畿輔聲華莫不聞六龍元卞氏雙驥復劉
君旌節來炎海臺門起大雲韋家經術在富國詎

紛紛

時權關粵海君父兄俱為大學士

諷諫詩無敵西京一少翁連枝黃閣上隔坐御屏
中出作乘槎使行高府海功緇衣能好我雅有古
人風

九疑

帝舜登仙後衣冠葬在斯九山相似處二女莫從
時斑竹空多淚蒼梧不忍思千秋哀怨曲祗有楚
臣知

古廟

古廟瀟湘尾微茫接洞庭美人雲蕩漾帝子水精靈
靈髻作君山小衣畱蘭葉馨微聞撫瑤瑟聲在數峰青

望爛柯山

仙人多善奕王質此中求峽束滇黔水江吞西北流
花邊棋局在石上斧柯留不見樵雲者茫茫我欲愁

頂湖山

瀑泉爭匯處湖出最高峰飛練幾千尺橫天一白龍
石船黃葉滿天鏡白雲封洗衲山僧至苔分麋

鹿蹤

吳制府招同諸公遊七星巖有作

峰峰開石室一一作雲根樹有飛梁勢厓多瀑布
痕花來頻送酒月上更開尊謝傅風流甚娛賓有笑言
乳多晴更滴處處濕人衣石氣含雲冷花光出水
肥漁樵元得性簪組亦忘機向夕聞笳吹山公醉未歸

舟次康州作

一入晉康口鷓鴣聲漸多水從紅樹出山逐白雲
過上下漁夫艇東西蛋女歌魚花爭取處片片是

煙波

舟從巖口入驚起鬱雞飛石出多成筍山開動作
圍香生芳艸地影亂白雲衣清絕錦江水峰峰浴
翠微

王借岡阻淺

水淺惟沙口停舟待暮潮楓黃霜色淡竹翠雨容
消米遣鮓魚換船將蛋女招蒼蒼山月上酒至放
蘭橈

食荔罷柬族叔友

林中丹荔盡尚有火山枝欲向新塘去頻乘掛綠
時舟從黃木口路指祝融祠君已家園摘傾籠贈

莫遲

新塘多美種荔枝最遲熟者挂綠從
吾家沙亭至彼采摘纔半日程耳

秋日閒居之作

抱疾在人外閨幃每晝居花嫌嬌女摘葉喜美人
書秋盡霜無信晴多霧有餘小經兒嬾讀孩笑滿
蓬廬

半畝蓬蒿滿栖閒日以貧白頭含菽母黃髮弄雛

人趁暖梅先發宜寒菊未新槿花能愛老樹樹作

深春

木槿一名
愛老花

繞膝皆黃口嬰兒復老萊衣冠時共戲書卷每爭
開道向靜中見愁從空外來無多忠養日白髮莫
相催

佚我無如老休嗟白髮新身從聞道健家以著書
貧畫外知三聖琴中見一人苦心黃菊蕊開落待
芳春

夾岍惟蒼翠諸峰望不分光寒猶帶雨氣濕未成
雲蜃蛤乘秋水牛羊下夕曛姬人共花語雙影月
紛紛

交游能漸絕穩臥越江邊天與承歡日人高養拙
年酒令秋氣爽花使暮顏妍纖嗇無筋力難希貨
殖賢

咫尺先公墓西山影到門龍鱗雙樹少馬鬣一峰
尊雨露愁寒食蒼蒿愴故園無田惟薄祭魚菽復

何言

代食文章在妻孥未耦耕彫胡慈母膳瓠葉庶人
羹野月榕間起山煙竹外橫飛聲寄鸞鶴長嘯是
平生

素業先人少生涯亦苦辛無心成本富有道在長
貧古几韓家母疎巾漢室人自憐矜節甚垂老更
霜筠

衣苦多罽布孤霜始作時漸寒蟬飲少將暮鶴歸
遲潮滿迷沙口風長斷釣絲年年螭蟬月冬簪一
漁師

壽兩廣制府吳公

冬至前六日

壽山詩小

五律三

六三

三度嘉魚候端江鼓棹迴黃冠趨幕府赤舄在裕
臺旨酒知難老新梅况早開春風吹燕喜散作太

和來

禮記野夫黃冠

歲歲來稱壽康公見秀眉上天平格日南海至于
時地暖嫌無雪花寒喜有枝炎方有公在春色不
教遲

臺門枕嶽庭襟帶盡滄溟北斗斟元氣南郊禮壽
星神明歸化育文武得儀刑作誦多髦士紛葩勒
翠屏

舟出濫口作

開帆從濫口倏忽盡空冥水底魚雲黑沙頭蚌月

青夜生南海日秋見老人星大虎門開闔波濤撼

玉屏

朝辭黃木口暮至赤沙洲地向江中出天從海外
浮眾船喧婦子曾步亂鳧鷗細釣吾多得河鮪更
上鈎

題白塘下劉氏園

野人池館好門外卽扶胥盡日惟煙水無人只老
漁鱗多霜降後魚上水生初風過河豚市吹腥滿
里間

罷釣歸來處榕邊繫小舠龍過雲氣亂魚上海聲
高水屋栖能穩漁書著未勞晨昏知水節多物件

香醪

風俗河鮑重秋來味更和大晉漁父少生釣野人
多白露家家酒鹹潮處處禾扁舟乘蟹浪向暮海
門過

微雨

微雨井泉發閨人汲未勞水寒方有氣山暖欲生
膏獵火乾逾起炊煙濕不高野夫尊艸服相見只
江臯

柑

今歲壺柑子霜稀頗不甜味回須十日香在且雙
奩摘恨鬆皮少歸勞素手織就中魚凍者幸未使

君嫌

柑以皮如魚凍者爲美

冬至甘酸雜黃堆几案遲凝心霜辦冷浸齒玉津
滋陽擘皮方好陰乾核更宜明年多買蟻盡護故
園枝

載自端州遠青黃滿一槎氣寒純是雪香熟總如
花盤裏多秋色懷中有露華人言洞庭上朱橘讓
紛葩

開籠閒數數大小愛圓勻香霧長濡手甜霜每在
唇藏時須待臘寄日欲當春兒女爭懷袖歡聲動
隔鄰

至日爭攀摘離離尚滿柯山人分未少縣令贈偏

多皮厚春能到瓢乾臘欲過兒童紛賭核食奈大

寒何

四會令吳君見餉數筐

沙地

沙地多喬木婆娑數畝陰膏含潮汐潤氣得水雲
深處處木威樹家人面林山翁重花利種植最
關心

錦雞

來從臨賀嶺識是錦毛雞羽翼生猶短金錢出未
齊籠中愁一啄窠裏憶雙棲欲向長林放歸飛惜
已迷

仲冬同諸公小集端州禪舍

南風難作雪喜得一冬乾白雁來催臘嘉魚出待
寒天心方至日歲事即春盤又作嵒臺會稱詩得
古歡

送真公還星巖精舍

隔水見山影微風吹有無不知玉屏上誰與白雲
孤石小亦成洞峰多不出湖茅茨歸去好霜月在

高梧

玉屏乃七星巖之東峰

石牀長幾許一半與瑤琴巖暖少秋氣山空多暮
音人隨流水盡日使白雲深禪寂復何事從師分
一林

同張超然尋端溪水巖作

峽口水巖開中含紫玉胎青花思一割白葉得雙
裁泉湧因人氣霞蒸似爾才精華分與我當爲著

書來

端硯以有青花蕉葉白者爲貴李賀詩脚踏青天割紫雲

舟下西江同超然分賦

白露難晞甚今年霜信遲水寒時作霧水少不成
漸出峽三江接迴帆兩岼移浮家吾與汝何日更
相期

宿永安墟作

一水含空盡微茫在暮天星分漁父火雨合野人
煙宿舸依荒戍還家及小年明朝是長至子半得
春先

佛手柑

香椽無大小十指總離離絕似青蓮舉初開玉手
時芬須霜氣滿味待露華滋未共壺柑熟人愁入
掌遲

玉指紛紛削香園變化來仙人雙掌合奇女一拳
開細卷如花瓣橫垂在鏡臺年年當小雪黃被乳
柑催

摘歸羅袖滿行與美人隨鈎弋拳難啓兜羅手易
垂橘林無此種花氣有餘吹歲歲畱過臘芬芳總
不衰

玉盤堆子母鈎帶似甘瓜亂作纖纖笋全苞一一

花乾時代蘭佩濕處拂霜華不食因香甚金錢買
幾家

幾樹高要峽場師種不多當知諸佛掌未見此菴
羅玉滑皮休損金辛味亦和女兒爭比况手爪好
誰過

柔黃無此好久握汗濡輕玉暖猶冰手香寒亦動
情橘官難問種騷客未知名作頌應先汝辭華取
次傾

初疑天女手一一散花餘多少縫裳者摻摻總不
如看來非橘柚最好伴琴書靜似幽蘭吐隨風滿
玉除

每當暄暖候一指一香生女手那能似卷然若有
情頻將雙玉執莫遣一珠擎大小垂堪憶當年掌
上輕

天南多異果汝最厥包珍一一成纖手枝枝是化
身欲花先置蟻未熟已貽人香裏含冰雪清冷每
入神

持來禪寂處香每發清機海月須君指天花待汝
飛單拳擎玉重巨擘得霜肥自是金僊物人間識
者稀

菡萏初開似香生大士家拳拳諸佛意指妙蓮
華臂定同金色心多作玉芽炎方奇果滿未有此

紛葩

陀羅千手變一果一如來清淨身元好青黃色更
催應須甘露灌復向寶林栽鹿女爭持獻和枝折
幾迴

未黃愁鳥啄沙壓一枝枝結實能三歲開花更四
時抑搔須汝甚拳曲與人宜盡道嘉名好麻姑爪
不知

空林相旦夕交手不曾孤一指禪非有三車語本
無天寒香稍減日暖氣全蘇把握如冰結餘芬在
玉壺

不盡相携意孿如若故人如蘭長在手似玉總隨
身甘以同心得香從獨宿親自多禪悅食不使點
茶新

枝低難墜折倒挂每成窠玉愛磨瑩細沙愁損點
多指長時屈曲情劇日摩挲小亦瞿曇胷參差出
短柯

指節玲瓏甚仙人削不成屈伸那有意大小總無
名忍凍襟懷滿沾香枕簟清紫驪來果下偷折幾
枝輕

尖尖長握固香玉一拳多響定含金瑣紋疑有玉
螺五輪瞻大士半臂奉曇摩作供諸天喜芬馨奈
若何

無瓢心總實蜜煎不教成玉老嫌微辣香乾喜更
清駢枝多種性指畫未分明亦是黃柑族炎洲獨
著名

雪痕斑駁少未損紫磨金不作光明手安知寂滅
心纍纍經一歲馥馥在雙林百果那如爾仙靈用
意淡

萋

檳榔雖口實因爾得甘多葉出稱扶檣藤生似女
蘿味教纖手辣香使玉顏酡片片勞包裹椰心奈
若何

越辣扶畱好根鬚味亦長長含甘液滿不吐細渣

香已雜椰花食還兼蒟子嘗檳榔無大小與爾總
鴛鴦

天寒猶滿架葉葉未霜侵已向雕盤取還從翠袖
尋潮生紅頰淺汗漬玉肌淡莫使吳娘醉檳榔揀
白心

蔓長緣屋角葉嫩未全辛卷作雙蝴蝶擎來一玉
人香生丹汁滿味得白灰勻肉子鮮逾好殷勤共
上唇

肉子檳榔乾者

菊

今年籬菊早不待肅霜催白處梅相映紅時鴈未
來禁寒元晚發愛煖忽先開多謝孤芳意枝枝爲

酒杯

梅花亦開故有第三句紫茉莉各雁來紅

白早同梅放黃遲及雪侵性寒宜歲暮香老愛秋
淡未忍全枝折惟將一朵簪夜來愁雨濕移傍石
牀琴

尋菊

花頭垂雨重朵朵濕雲邊日照寒英少霜含苦蕊
偏秋淡惟汝在歲晏欲誰妍野外還遲暮相尋及
雪前
饑春愁穀盡菊葉正鮮新欲種無閒地能餐卽古
人蘭分肥土滿竹作短籬頻甘雪多濺潤苗長欲
過鄰

漁婦

漁婦雙鬟濕波潮出沒中手持葵鯉串身倚蓼花
蓬要米量偏誤爭錢數未工買魚人莫笑不與蛋
家同

蛋戶

蛋戶紛無數爲生傍水村食魚多子女在艇有雞
豚簪布時能作漁歌亦未喧夜來西潦發笊簞滿
江門

歸舟得二山鵬喜賦

二禽瀧水至絕與畫眉同欲得長相喚須教各一
籠不驚多飲啄無恨是雌雄歸向吾兒女綿蠻水

竹中

山鵝與畫眉相類

歸舟無所有，祇得二珍禽。與我為閒客，娛人是好音。餐須香米滑，浴貴翠盤深。夜使同筵宿，休傷伉

儷心

白鵝一名閒客

不眠

不眠因落葉，秋為一人聲。是夕如聞鴈，含風欲過城。閨中砧杵急，隴上稻梁成。蟋蟀催人甚，依依歲暮情。

一夕

一夕吹人老，蕭條苦朔風。鴈愁菰米少，蟬恨柳條空。水菽謀偏拙，文章道亦窮。林烏頭白盡，待哺意

無窮

客邸

客裏無衣甚，歸同婦子寒。老令高臥好，貧使薄遊難。丘壑平生在，漁樵一日安。黃花佳色滿，人向暮時看。

寒螿已淒急，昨夜得秋風。催我林間葉，蕭蕭落夢中。無衣愁白露，不寐恨邊鴻。促織何勞汝，蘭閨久已空。

九日

九日安長久，嘉辰得幾何。貧愁高詠少，老恨遠遊多。酒以黃花好，羹因紫蟹和。荒沈吾已矣，嵇阮夢

相過

舟夜

蘆花清淺處魚食月光寒
吹笛愁鴻鴈驚飛過碧
灘風多須繫艇露少好垂竿
竹裏窺人甚青青白
玉盤
花隨魚上下時拂釣絲輕
明月每同宿白鷗如有
情露侵書卷濕波漾酒杯清
莫掩蓬窓臥秋天半
欲明

庭前

庭前一梨樹日夕數蟬來
爲我作長嘯餘聲似有
哀風多時斷續秋盡復徘徊
玄鬢蕭蕭影休令落
葉催

從澹翁六叔乞取香柚

愛爾增城柚黃時及大冬
霜多催熟早雨少使香
濃就樹須親摘成林卽素
以畏寒吾不食持作玉
盤供

過獻孟池亭采菊作

愛爾池亭好黃花食幾枝
口香寒露日心苦暮秋
時有地開難早無人落
易遲故園明欲返吾亦有
東籬

食葉從春始花時汎酒多
味因霜氣好香奈露華
何蟬影初辭柳螢光尚在
荷冬來真菊少采采好

相過

開透疑無蕊花頭色更黃食須尋細朶簪莫墜寒香惡濕常依日空寒必待霜淒清當歲暮不忍說

孤芳

瓣瓣分蟲口黃黃味最甘離披芳艸外冷落小亭南帶弱多縈石莖長或過潭野間憐苦蕙采亦滿花籃

舟暮

暮行洲渚外江路苦烟迷白鷺不相引流螢空自低漁村無浦口人語似林西不寐孤篷下驚心水鳥啼

賦得山大丹花為大司馬畱村吳公壽

不識珊瑚樹多疑是赭桐純丹因向日最勁為含風烽火柏千榦芙蓉砂一叢炎方惟有此可以壽

吾公

公於南天衆卉最愛山大丹花錫嘉名曰珊瑚

柔見風則勁 趙佗嘗稱珊瑚樹為烽火柏

珊瑚亦作花朵朵越王家太赤纔三歲微黃即九霞長開無大小不謝最紛葩絕似公難老精含海

日華

珊瑚三歲已赤

誰將鐵如意擊碎女珊瑚散作山丹樹千葩共一跌如盤皆赤玉有火是陽珠公惠嘉名好千秋照海隅

綠端硯爲巖藕漁宮允作

盡愛端溪紫曾知綠玉無光分銅雀瓦色映石家
珠追琢憑君好摩娑取自娛毋貽美人去博得錦
襜褕

一泓池水好長作鴨頭來蕉葉磨逾出苔花洗不
開益君金橐物空爾玉堂才並與羊肝紫香榆作
匣回

生長當銅綠精華日已堅絲憐黃作裏玉恨紫成
煙睂黛含猶淺心花吐正鮮飲池么鳳子毛羽似
君妍

亦欲向羚羊兼金買一方偏安賦鸚鵡更可詠鴛
鴦色並黃裳美情分碧玉香不須鸚鵡暈已比水
巖長

自此東西洞無煩割紫雲青花雖復爾綠髓不如
君久握成溫玉輕研許翠裙蕉間天一尺日夕吐
氤氳

望虎門諸山

海門山滅沒蒼翠似空天暮去惟餘影秋來不是
煙瀑高難作響峰小易成妍悵望蘿衣客攀枯何
處邊

沙貝望羅浮

諸峰看漸近最小是麻姑雨過雲衣亂風吹鏡影

無水分雙嶽勢雲作萬枯圖憶向華臺去秋林一
杖孤

新婚詩爲獻孟作

之子求婚媾長歌美女篇成言過十稔乃字又三
氣展轉干戈後艱難玉帛前蹇修予最早月已百
餘圓

辛苦成鳧藻遲迴得兔絲天雷琴瑟好人與鳳凰
空鮑女仙難學蘭香笑不知莫教衣不著已及散
花時

一曲東湖水粧樓俯碧波翻愁飛雪就不奈玉簫
何烽火珊瑚樹車輪蛺蝶羅雙飛誰不羨鳳唳正

相和

曲逆長貧日淳于始贅時滑稽才士口姣而獻侯
姿鳳鳥媒雖拙熊羆夢未遲爲君頻緩帶明歲菊
花期

詠漢高祖

嘯命羣雄易屠沽起漢家蛇分芒碭澤龍死博狼
沙五載成黃屋三分尚翠華遺臣精爽在願作寢
園花

一代真湯武功高古聖王大風開日月長劔破鴻
荒赤帝天宗子黃龍漢故鄉千秋誰得似烈烈我
高皇

賦壽周君

時爲王將軍客

幕府才賢盛將軍禮數優龍驤君不棄燕喜日相
求綠玉抽蒲艸丹砂結石榴華筵開午日爲壽盡
應劉

贈黎大

之子板橋邊園居樂志偏斜浴蓼涌水盡作荔支
田酒鬱青霞意花娛白髮年蓮鬚高閣在多使父
書傳

不是芭蕉葉安知秋有聲瀟瀟似疎雨一夕滿江
城重以天邊雁能淒人外情愁開一尊酒爲子到
天明

送嚴藕漁宮允還梁溪

宮允清華日依然大布衣放知方朔是狂覺子陵
非太液多泉水瀛臺有釣磯此中依隱好肯卽故

山歸

君以布衣徵辟

珥筆蓬萊久三年接御屏人如若耶月客是富春
星莫恨蛾眉短須愁蘭佩馨金螭東畔立可許一
沉冥

作客來南海迢遙別禁闈平生紫芝艸不愧一當
歸吳米冬春白湘魚春鱸肥停舟待丹荔未可片
帆飛

辭翰工無敵慚予非賞音無能師筆勢不敢說文

心團扇書難得生綃乞至今蕭蕭一水石珍重比
雲林

汝與鴛湖客工爲南宋詞詩人多莫及後輩有餘
師舊曲驚雙絕新聲妙一時小紅低唱者休被內
家知

君家富山水陽羨接吳閶蓴菜三秋美鱸魚一代
香清辭惠泉似至味芥茶長自浣端溪硯臨流日
幾方

與鴈辭炎海翩翩柰爾何鷓鴣畱客甚楊柳繫人
多異日梁溪曲同誰漁父歌錫山泉最好春釀寄
巖阿

日南無月令秋菊向春開嗟爾采芳客花時鼓棹
迴金裝殊未滿香浦好重來父老看持節雍雍陸
賈才

壽季母唐夫人

作令羅浮下而夫鮑靚賢畱丹與妻子食作地行
仙蛺蝶麻姑物梅花玉女泉鳳雛能孝養文采更
翩翩

送徐道冲

君爲名父子詞藻又徐家一吐珊瑚筆江郎不見
花來分珠海月復有玉山霞相送新州去離支滿
古槎

翁山詩文
憶在鴛湖曲君才十四齡一朝齊老鳳幾日掩香
涇以我長相望而翁使者星秋來能度嶺先問一
沉冥

宿檳榔塘

未夕江干宿涼驚落葉新白鷗如識我螢火亦依
人月濕非關雨沙乾欲作塵戍樓催早起吹角一
聲頻

舟入永安縣作

舟行苦清淺牽入萬峰雲水向雙琴合山從兩髻
分秋溪涼更早野菊晚逾芬一路皆丹嶂嘉名人
不聞雙琴謂南北琴江兩髻謂丫髻山溪有曰秋
溪嶂有曰梅花曰雞冠曰紫簾曰白葉其名

皆美

最好梅花嶂峰峰有一源山家多近水古木卽成
村婦子知何世牛羊亦自尊舟輕行反緩爲愛瀑
聲喧

入秋鄉江作

欲雨水風起白雲吹滿船秋鄉多落葉一半逐流
泉白鳥一溪影人家幾處煙片帆平嶺過驚起鷗
鵠眠

秋鄉江口入一路有秋香花以無名好蘭因不采
長山晴雲始白林暮月初黃竟夕憑雙棹依依水
鳥旁

次義容江口作

瀟瀟江口雨聲向夢中寒一夕同征雁沙邊宿未
安淚將楓葉滿愁作落花看白首離居盡孤琴不
忍彈

自藍塘至秋鄉江口作

灘聲暮更急風外亦潺湲是夕兼微雨吹泉滿四
山舟隨初月引夢向故林還白鷺時相笑君閒亦
未閒

望永安縣諸山

紫簾將白葉雙嶂隱藤蘿欲雨陰霞起先秋暑氣
過水嫌琴口小山愛髻鬟多明上烏禽嶺當如瀑

布何

自林田至橋田作

谷裏茅茨少人煙各一峰林多惟篠蕩花小亦芙
蓉家有翻車水門多偃蓋裕山田反肥沃此地最
宜農

宿寬清溪作

人家圍水竹溪響一車風鹿跡春泥滿蟬聲暮雨
空夫畊青艸外婦汲白雲中鷄黍能畱客歡然話
歲豐

度鹿母嶂作

朝來山氣盛霧濕未成雲蟲響千峰合禽聲兩岫

分野香知火粒林影識花裙麋鹿平生友何因不入羣

觀神江諸水作

細雨溪流發聲含萬壑風瀑花將落葉天半洒秋空往日廬雲上諸峰布水同玉川三疊雪更在夢魂中

度大小蚺蛇嶺作

雲際一江小飛流直到城穿林時見影出谷乍無聲舟逐千峰轉篙愁一石迎蒼松最深處煙火未分明

下田渴瀧

舟從萬峰落勢似一泉飛片石含風雨孤帆隱翠微輦田隨處有水碓不曾稀采笪多猗女提筐谷口歸

白溪

一路玩流水秋溪又白溪時時隨瀑布穿過白雲西山翠日三浴林猿秋一啼清涼漱冰雪得性此幽棲

苦竹派道中

田隨山曲折處處水泉飛車響知溪急輦高識土肥禾垂將吐穗蓮落尚畱衣竹筍從人取青青滿翠微

贈永安張明府

文采將軍冑知交踰十年何期桑梓地遂得令公
賢豈弟多新政精微有內篇訟庭閒坐嘯聲入數
峰煙

愛爾江名好南琴與北琴絃歌宜此地雅頌有知
音鮑靚神仙事文翁教化心異時循吏傳名向漢
京尋

絲來曲

絲來巫峽女本是楚山雲十二碧溪裏何峰不似
君朝朝香髣髴暮暮夢氤氳玉珮難要結人神道
自分

霜鬢欲成絲多因生別離無情是瑤瑟未及曲終
時魂夢滿三楚雲山紛九疑天邊無限樹總是一
相思

猿嘯有時斷其如溪水聲潺湲將客淚日夜向江
城一自美人別三逢秋雁征寄書無處所腸斷玉
琴情

江臯休悵望煙樹最迷人彼美如秋水相思在白
蘋彩雲一以化香艸更無春白首多哀怨無端爲
雒神

蟬

蕭蕭木已落玄鬢早驚霜爲我嘯明月臨風殊未

夕陽
央夜因雙響寂秋以一聲涼幸有高梧在相畱到

吟向無人處初如落葉聲頻將流水引寫出素琴
情涼露有餘飲空林多所驚不因天籟好高潔可
誰名

羽化因風露蜉蝣汝亦仙一聲答長嘯飛向未寒
前落葉一相送餘音誰爲傳開琴理秋思髣髴古
槐邊

答梁陳李三子見過沙亭觀穫之作

秋分三日後我稼早黏收之子過場圃相將慶滿
篝鈎鎌那有暇雞黍未多畱辱贈詩篇好知予石

戶謀

蠓

蠓逐鹹頭上漁人網不稀未銜禾穗罷又食稻孫
肥買去菱塘海烹來荔子磯就中膏滿者持半奉
慈闈
鳳尾多魚醢烝雛並上盤閨人餽夕膳稚子佐朝
餐冬食宜鮮羽春煎貴玉蘭蠓黃隨月滿下酒有
餘歡

兒喜

兒喜何爲者姨娘送酒來頻呼香線女盡洗白椰
杯六子歌聲發雙鬢舞袖開堂前皆角髻爭戴一

花梅

兒喜何為者盈樽是荔漿三杯先祖母一酌滿仙
香花發春初暖鶯啼日正長大歡陶令子扶上讀
書牀

兒喜何為者金杯各入唇競將膏蠟好來送肉芝
春橘子香盈袖桃花落滿身却嫌多笑語喧動北
堂親

贈金陵某子

人是六朝餘秦淮水際居能為南越客定著大中
書作賦無吾黨為鄰必太初逍遙無不可門有巨
溟魚

食柑

黃苞披未已素手授甘多齒怯霜華冷皮憐玉味
和珍消騷客頌香解美人醅摘得橫枝好頻乘大

雪過

柑以橫枝
生者為上

葵

有美北園菜冬葵最晚彫暖多晞日葉寒少負霜
條靜裏香親摘齋時味手調年年勤抱甕灌溉及
禾苗

鱗魚

終歲鱗魚有漁人網不稀江南當夏美嶺外入秋
肥花靨銀鱗作冰盤玉筯揮家人工斫鱠不遣酒

杯違

江南女工以鱗魚鱗為花屬纖明可愛

山行

女蘿低拂客一半在枯枝鳥道穿花細蟬聲出水
悲鬪歌溪女早爭宿野人遲葉落多蕭瑟秋聲不
自持

讀吳漢槎秋笳集有作

吳江詞賦客謫戍自丁年淚漬枯花月愁深粟末
煙東隨射魚部北盡落鷗天弟子多蒙古人稱教
習賢

黃鵠歌聲苦何殊漢細君蛾眉拋白草鳳翻墮青
雲肉酪調齋飯毛壇製戰裙雪花如掌大持打皂

鷓羣

戍邊同婦子耕得橐駝深白齟含霜凍黃沙捲日
陰柳間烹野馬椶下掘人葭干軒多霑賜牛羊一
片心

南望是遼東穹廬接混同鷗翎鋪屋白馬乳點茶
紅夜夜哀笳裏年年大帳中詩篇傳種落盡道漢
兒工

忽因長白賦生得人淪關都尉頻揮涕丁零亦慘
顏未曾埋雪窖不必示刀環三百胡笳弄都歸怨
曲間

烏龍嗟久戍白鶴忽來歸馬湮闕氏酒魚皮鞋子

衣髡鉗同蔡伯涕淚似明妃不盡邊秋曲聲同笳
吹飛

未共黃榆老容顏似夕暉雖同翁主嫁亦逐子卿
歸捲葉拋胡管栽花著漢衣喜無青艸塚寂寞在
金微

才子多無命如君亦有時千金生駿馬百琲重文
姬箏篋羌人曲琵琶漢代辭何如君樂府三復不
勝悲

庾鮑才華在初唐汝更新梅花金管女木葉鐵衣
人一別鱸香水重看鳳闕春故園知己得勿復怨
沉淪

采藥

采藥復何事持筐且翠微平生多遠志白首未當
歸露溼花粘足雲乾月在衣蟬聲與流水自喜賞
音希

雨大

雨大新成水渾流滿稻田沙痕微出艸野色淡含
烟蠹食花鬚落鶯飛柳帶牽人家新筍好一一
魚鮮

荷葉

水冷錢難大田田未直荷須知花太少總爲葉偏
多筍嫩魚休食莖疎鷺好過池吹香氣滿柰爾惠

風何

出水同菱葉參差點鏡心魚穿無大小鷺立有浮
沉雨過珠難駐風來香易侵頻令溪女愛色比翠
裙深

似欲隨波去風吹漸滿塘下穿蘆筍小上拂柳絲
長舒卷多乘夜芬馨為向陽持來供枕簟一夏足
清涼

金魚

魚好憐蝦尾金紅更上鱗雙雙初咬子一一不驚
人荷小無藏處菱多亦礙身月光為飲食夜半出
青蘋

蠶熟

蠶熟暮春時多眠益有絲病教挑錦少愁使織縑
遲乳燕方銜藥涼蟬又噪枝籠間嬌鳥小與爾一
相思鳥名

蟬

蕭蕭楓葉外秋逐一聲來是日兼鴻雁含風到越
臺浮雲時躑躅落月亦徘徊嘯父知君是相畱傷
酒杯

風露誰爭汝清冷一夏過聲含秋氣早影逐柳陰
多未化惟香蛻無心即太和夜分猶嘒嘒涼籟滿
藤蘿

聽鶯

次吳大司馬韻

不分春歸早流鶯聽欲無清和三月過風景一人
殊音濕因香雨愁深似綠蕪山公催上馬醉遣數
花扶
花間一兩轉飛入柳陰無但使春聲在何妨物候
殊含櫻過曲沼梢蝶向平蕪醉爲絲蠻甚公歸綠
玉扶

新篁

粉籜春初解風多壓向西陰生雙野岸綠殺一花
溪笋迸雲根亂梢橫水影低青光教斫取詩向膩
香題

李賀詩斫取青光寫楚辭賦香春粉黑離離

到梢猶抱籜不厭出林長笋亂愁侵砌根多恐過
牆釣須竿拂月冠要簪含霜老有龍鍾節爲簪更
未央

荔枝

鵲向離枝喜紛紛子熟時銜愁雙玉重啄恐一珠
遲蝙蝠香先得鴛鴦影不離殼紅浮水滿持作落
花嬉

蟬聲催盡熟黑葉影離離買恨穿錢少餐嫌辟穀
遲美先畱小核寒更浴香肌掛綠無多子盤中但
水枝

木槿

杜題同用暉字

受色朱天好長含灼灼暉移從君子國襲作美人
衣紅燥因晴久香濡恐露晞朝華多麗賦亦欲繼
羊徽

舜華難與久每恐美人非好日嗟無及香車願不
違紅葩餐未忍紫蒂摘休稀為與衣如雪蜉蝣生
意微

木槿一
名日及

佛桑花 同用扉字

玉瓶多麗朵人插佛桑稀一日同朱槿榮華亦有
歸顏紅能愛老粉白未傷肥兒女尤栽汝家家映
竹扉 木槿一名愛老佛桑類
木槿婦女多以爲餐
燒空嫌太赤朵朵似朝暉榮落須臾事爭開亦未

非簪令雲髻豔食使玉顏肥一夏光籬障因君日
掩扉

玉簪花

同用稱字

縮髻花宜汝新簪露不勝那教香玉墜自有膩雲
承贈去愁恩重擎來恐冷凝未開名絕似贏得美
人稱 唐詩玉簪恩
重獨生愁

不愁簪鬢後玉重膩難勝朵朵如鏤雪莖莖似插
冰暮嫌風半吐朝愛露全凝自向臣冠挂頻來好
色稱

茉莉

同用勝字

蘭雲相掩映一朵辟炎蒸香吐玲瓏雪光含綽約

冰包同萱艸帶貫共素馨繩女愛花梳甚殘時尚
不勝萱艸帶
茶名

佳人銷夏物一朵有餘冰小摘香奩滿多簪寶髻
勝薰嫌蘭氣烈養愛水光澄入茗凌朝好甌中泡
紫菱

夾竹桃 同用疎字

葉作篋管好萋萋也不如花猶之子在紅正欲歸
初况有檀欒節看同綠玉疎彼穠無此美羨殺武
陵漁

似嫌花少好夾竹使扶疎節肯含春粉枝應亞玉
除雨憐開未淡風恐落無餘露并持相比天天定

不如

賦得池上萍 同用情字

自向寒塘上浮游得此生無根風亦起有實日終
明花落魚兼唼荷穿鷺獨行隨波吾亦爾弱卉最
關情

菱根猶自植嗟爾最孤生飄蕩雖無意畱連亦有
情自知蘋菜味人識水華名綠亂蘭池影鴛鴦照
不明菜之美者有崑崙之蘋蘋
萍之大者萍一名水華

蓮

栽紅貪取藕十里白蓮稀葉亂田田影花飄處處
衣冰含香子脆露作藥珠肥不遣姬人摘防驚水

翠飛

藕

白蓮尤好藕况出半塘西化液同瓊屑含消在瓠
犀節疎冰易折絲亂玉難齊為愛甘腴甚朝朝踏
紫泥江淹賦藕水折而玉清孫楚賦含珍藕
之甘腴劉孝威啓色華玉樹味奪瓊漿

菱

一枝先藕白兩角復菱紅剝雪春蔥冷含冰玉齒
融花光長在鏡蔓影亦浮空日夕晶盤滿寒泉浸
灌中

畫松

似帶黃山雪蒼蒼五鬣姿卧龍餘爾在化石亦吾

師雨欲生鶯素風先動兔絲畢宏微渲染神妙至
今疑

送焦君還三原

每見西秦客三原更繫情况逢焦御史子姓最知
名瓜葛因忠烈金蘭託友生匆匆相別去樽酒且

同傾

都御史公源浦
死闖賊之難

南北雙城起梨香醞萬家鄭公渠畔柳薄后廟前
花歸趁三春好休驚兩鬢華為將西望意傳與大
琵琶

送余君

九成臺下水最是武溪深送爾廣陵返潺湲一片

心承歡南越物起舞白華吟我友邗江滿殷勤爲
寄音

送人往長白山

雪使山長白水消作四江人淺三百里貂鼠一千
雙汝去神池上潺湲弄石淙蒼蒼椴樹好應駐碧
油幢

秋初已冰雪凍解百泉侵北接烏龍濶南連鴨綠

深君求白駝鹿應向黑松林肅慎有遺矢還從雲

際尋長白山在寧古西上多積雪盛夏不消有神

池一區廣十餘里所出之泉爲烏龍鴨綠混

同三江之源蓋一飛瀑而分四派焉池有環生藉

題海寧女子李因畫鷹

誰家纖手好寫出角鷹真側目無餘鳥愁胡絕似
人奇毛橫朔漠殺氣動秋旻不道鮮飈起飛颺出
墨神

江邊獨酌有作

水鷺看人醉風花逐客狂蟹嫌雙跪少鱸愛四腮
香無用惟才筆多情是酒鄉六旬猶處子華首勝
紅妝

嘉魚

峽口嘉魚少多生大小湘天寒方出水味好爲餐
霜丙穴冬春異辛盤旦夕香無人來汕汕南有是

羚羊

嘉魚產瑞州大湘小湘二峽以冬月出穴與蜀嘉魚異

鱸香爭似汝作鱠稱金盤肉映苔花嫩膏含石乳

寒笑從諸女買愁祇一人餐尺素那能寄鱗鱗出

峽難

新月

新蛾長復長畫出水中央且莫清光滿頻含白露

涼愁生牛女夕夢繞翠樓旁一縷從銀漢蛛絲縈

斷腸

新蛾織復織解畫是冰蟾鏡未開朱閣鉤先掛翠

簾花憐香細點雲愛粉微霑爲學唐宮樣依依看

不厭

贈徐明府

自君來乳哺人爹始興王水火從今免慈威正未

央芳華山縣滿碧艸訟庭長已有徐公美還多苟

令香

送人出關

一出悽惶嶺遼西總是山柳分蒙古界花合武寧

關去國身雖老憂邊意未閒風霜殊慘淡莫令損

容顏

鱉

今年鹹上早膏鱉滿江波價比魚蝦賤餐如口腹

何方肥頻作蛻未熟已銜禾螯跪分兒女無令暴

棄多

王觀察招食嘉魚率賦兼以爲別

詩人歌式燕最重是嘉魚罩汕歡多有鱠鯊嘆不
如寧期晉康水亦似沔南漁出穴當冬始分君玉
饌餘

南有誰知汝來從大小湘金盤頻作鱠玉筍盡含
香飲燕嗟難再離憂正未央何當臨丙穴更與使

君嘗

公將之
任蜀中

此度嘉魚會銜觴淚欲揮鱗魴留未得蒲藻更何
依異日相思甚休將尺素違一雙憑錦水春飲乳
泉肥

題華不亭

爲佟聲
遠作

却恨多蓮葉田田不見魚鏡開雲影外珠瀉月光
餘雨滑休扶杖風涼且枕書愛君亭子好絕似水
中居

題畫

古木最多處茆茨知甚涼秋蟬定無數聲似碧溪
長未葉山已綠無花野亦香如何圖畫裏有此白
雲鄉

細飲

香醪須細飲莫遽玉杯空花片霑唇好梨漿沁齒
同長酣應少德薄醉卽多功一斗能彌月那教美

祿終

送雲君

五侯老賓客汝亦漢君卿此去京華道應高游俠
名關城穿夏口朔塞出宣平為謁吳開府將子企
望情

秋聲

秋聲亂庭樹片雨助蕭森山曉氣初爽溪晴寒已
淡虛無茅屋火斷續石牀琴古調誰相和含風蟬
一林

病起

病得秋風起悲涼生白頭漸消磨劍力長抱著書

愁衆鳥空相命孤雲豈有求又亡椎髻婦誰與伴
黔婁

滂沱

滂沱因賤子涕淚作秋霖后土呼何及皇天哭至
今悲風相激烈落木為蕭森薄暮雲泉外哀猿何
處林

乍晴

天晴晴未定秋在積陰中雨決銀河盡雷收鐵殿
空朝餐香小菽夕臥冷焦桐几席愁霑濕移書累
女童

昨夕

昨夕涼風至秋因片雨淡一天新涕淚萬里舊愁
心嗚咽野猿嘯潺湲流水音無人傳苦調一一入
清琴
秋聲一二葉已似暮猿吟况復含風雨彌令多苦
音愁當裕戶月忍弄石堂琴香絕無人處幽蘭知
此心

過黎氏山館作

主人梧柳好來爲聽鳴蟬引響隨溪水流音入碧
天冷分清露飲香擁落花眠招手裕間月娟娟出
暮煙

七夕前三日粟園小集分賦得東字朝字

生明才一夕已盼絳河東三日先烏鵲雙星卽紫
虹應須瓜果待莫遣酒尊空愛爾池亭好披襟納
晚風

黃姑頻七夕白帝始三朝令節開針縷佳期望斗
杓迎涼風乍至送暑雨初消月出樓西角催吹紫
玉簫

以相思子餵相思與公漪聲遠分賦得思字
珍禽與紅豆總是一相思啄取珊瑚粒爾令傷別
離無情清淚化有恨美人知玉手勞親飼愁卿記
曲遲

相思最小鳥終日食相思共命迦陵似同心珠樹

知香銜紅的的冷宿碧枝枝多謝瓊閨意殷勤饑渴時

么鳳還

聲遠之夫人以綠毛么鳳賦于幼子明漁持至家中幾為貓兒所害幸姬人救之今以么鳳還時七月牛女夕也

七夕今何夕穿針笑未閒畫樓兼有喜么鳳得生還影挂紅簾外香收綠翅間美人依舊主得意任迴環

兩日辭仙掌含愁似憶家珠應歸石氏鳳本出桐華綠襯千重萼丹凝一片砂兒童憐愛甚只恐損紛葩

三寸羅浮鳳仙靈一化身細微丹穴族嬌小綠衣

人昔在梅花國今為繡閣珍復歸織手上香稻使情新

娑娑長膝下君正弄雛時毛羽非黃裏衣裳豈綠絲少供紅豆子多挂白華枝忍奪香閨好教他憶別離

代泛亭坐月次白真人韻

今宵湖上月不向鏡中看愛此高亭好秋光一倍寒微茫若煙雨清淺似沙灘倡和仙靈接從公此最歡

林下

林下風流在多能盡不如桃花曹氏畫萱草薛濤

書扇作乘鸞罷裙裁化蝶餘墨香多素練麗句數
行疎

秋日學書作

草堂無事極風日正清泠一筆爲芝草雙鉤作道
經柳衰枝更翠荷老葉逾馨墨鈔宜秋爽淋漓寫
素屏
伯英高尚客弟子草書多卷練龍蛇起揮毫風雨
過神明真聖者變化柰君何如漆韋家墨臨池日
幾螺

贈相士萬君

相人唐舉在言我必期頤鴻鵠將橫絕熊羆更得
時君雖遊戲語自可帝王師待到杖朝日來看鸞
鶴姿
但得長華髮吾生已有餘武公思好學伏勝欲傳
書枯瘁非衰甚清高每晏如君言過九十應更惜
居諸

奉寄桂林汪別駕晉賢

美人桂林在何以報瑯玕持此青天月爲予白玉
盤光含清露濕影吐淡雲寒安得如蟾兔相依玉
樹端

山水建陵好曾遊溯碧湘豈知新別駕卽是古王
祥孝友先爲政聲名早有香呂虔應賴汝復作股

肱良

獨秀紛蒼翠城樓勢半銜定同顏太守復有讀書
巖野日開潭鏡天風起石帆蒼蒼虞帝廟更爲植
裕杉

西甌元半羸風俗尚巢居文獻雖云少春秋亦有
書嵇公箋艸木范氏疏蟲魚更作圖經補閒乘坐
嘯餘

文雅早相知交深未見時如何同駱越尚復阻湘
灘昔繫桐鄉夢今抽桂水思始安多美酒將作暮
秋期

送汪君復往桂林

西上從陽朔沿洄桂水南青羅無數帶碧玉幾重
簪帝馭風門接仙書石洞探磨厓多處所百仞拂
煙嵐

所思不相見南北似灘湘不是來雙鯉安知在一
方君歸盤石上更取素琴張寫我懷仙曲聲含秋
水長

菊

一從籬下采黃菊屬陶公朶朶無懷氏枝枝太古
風香沾紗幘潤光映玉杯空大雪開逾盛同心梅
與同

芬芳憐野蕙不必菊花真淚憶分甘母情牽共苦

人一生長抱節九日益傷神搔首無多髮吾衰爲不辰

清高是女華生長出陶家欲泛無名酒長餐當紫霞敢期華髮變但願大年加華盡還羨葉神仙未有涯

重九已嘉名秋華况日精紛葩非衆艸服食是平生蠲疾憑金藥忘憂仗玉英當年朱孺子於爾得仙成

霜催苞藥熟未吐已芬芳不忍同秋草惟知媚夕陽粉多嫌太白金重愛純黃朶朶從籬落誰爭處士香

尹君七十又一生日贈之

故人無幾在今子幸長年菊老香逾烈裕寒節益堅世人多服食吾道豈神仙日夕壺觴滿羲皇枕席邊

養壽知多術長生亦尹洪但能生肉角不必更方瞳種藥先葠草餐花及桂叢長予才五歲早晚古稀同

老友真難得其如相見希已能三叟似未卽四翁非野鹿曾忘世江鷗亦息機年年花發候貌與玉蘭肥

生香薰夢寐清絕暮年心竹掃長空影松流太古

音老人峯在戶漁父櫂穿林與我
春酒珊瑚洲
外尋

梁君以重陽生日贈之

陶公愛重九此日向東籬好是登高節歡聞墮地
時黃花知益壽綠髮恐成絲不惑君能否方強學
未遲

春秋佳日多重九亦清和令節頻生汝華年奈去
何綠尊知滿飲烏帽定狂歌未得曾相識遙憐在
薜蘿

